

續修陝西省通志稿

第三十九册

卷六十七至六十八

續修陝西通志稿卷六十七

名宦四

布政使

吳士功字惟亮一字凌雲河南光州人雍正十一年成進士改庶吉士散館授吏部主事歷官至山東鹽運使乾隆十九年遷陝西按察使二十二年遷陝西布政使尋命護理陝西巡撫奏宜君榆林葭州懷遠府谷神木靖邊寧遠

疑寧遠字有誤

二先旱後潦督臣黃廷

桂奏撥寧夏米麥五萬石分賑懷遠靖邊等縣自寧赴陝中阻黃

河沿邊早寒河冰卽難挽運臣先期飭催早運抵陝其奏撥綏德米脂清澗吳堡四州縣米二萬石協濟榆林葭州山路崎嶇冰雪載途更難馱運蒼黎待哺孔亟臣飭添僱騾馱趕運俾早霑實惠諭令竭力妥爲之尋奏藩庫銀錢交代新任接收出結督撫盤查

保題定例綦嚴但日久視爲具文請嗣後撫藩離任奏請陛見之日即將在任庫項曾否挪借有無虧空之處另摺附奏其或在任不久調補遠省資斧不足欲借庫項者一併據實陳奏新任撫藩接印後亦於交代限內另摺奏聞仍照例出結保題則挪借積弊可除上以所奏簡而易行著爲令未幾擢福建巡撫諭俟新撫鍾音到陝後再赴福建新任四月奏延安府兵糈向例各縣民運交府倉分防弁兵赴府支領山高路遠往返五六百里民運赴府費倍正供兵領回縣耗費過半查甘泉宜川延川延安俱駐弁兵請將四縣征收民糧各就本縣支給汎兵從之復奏隴州汧陽縣跬步皆山歲徵屯豆五百四十九石零鄉民赴城完納往返需費不貲見今積豆萬餘石本地營汎旣不動用鄰封難資協濟商賈不願販糶與其坐視霉爛莫若改徵折色請於二十三年爲始每石

改徵銀六錢五分解司充餉舊存豆石糶銀報部從之在福建任坐事鑄職發往巴里坤效力贖罪以捐銀准其回籍卒年六十七子玉衡湖南永州府知府玉綸兵部右侍郎士功篤於至性幼侍母王疾顛神求以身代疾旋愈事繼母彌謹爲人沈毅有大略能拯人於厄好直言意度豁如也旣歸田終日擁書坐一室未嘗有幾微感憤之色卒之日遺命兩子盡心官守無一語及家事焉

清史

本傳參善獻類徵
吳士功墓誌銘

溫承惠字

山西太谷縣人乾隆丁酉拔貢朝考一等特旨以

七品小京官用籤分吏部拔貢生用京官自此始久之補主事遷員外郎郎中五十四年授陝西督糧道明年丁母憂服闋補陝西延榆綏道嘉慶二年二月川陝楚三省軍興陝西巡撫秦承恩奏派承惠於興漢一路團練防堵旋丁父憂奏留楚營尋以剿賊功

加按察使銜賞戴花翎仍攝延榆綏道事會川軍竄匪犯平利安
康承惠多方遏截屢有斬獲得旨嘉獎下部優叙方賊之擾平利
城東也承惠恐其北竄馳往布置適山水暴漲承惠墜水遇救得
免仍馳赴險隘扼之賊不能北遂獲捷奏入上特厯念降旨垂詢
焉服闋命以按察使銜補授延榆綏道久之擢按察使承惠奏言
賊擾陝境已歷數年各路軍營兵數核之原額不及十分之五賊
東西奔竄牽綴官兵官運糧餉往往不及領兵大員不得不駐兵
待餉賊得乘間遠逸請益兵以資勦捕至川陝楚三省邊境綿長
派兵分守各下斷無如許兵力莫如聚歸一處扼適中之地探賊
所至卽取道邀擊如此以逸待勞聲勢聯絡賊旣不能深入自可
痛加勦除至索倫吉林兵最爲得力數年來進山馬力多疲請飭
鄰省協撥健馬豫備更替乘騎疏入命經略大臣額勒登保籌酌

具奏尋有川匪竄入安康承惠馳往迎擊擒賊數百殲賊首王金柱巡撫台布上其功上深嘉之賊逼洵陽承惠由漢江東下聞安康亦有賊擾卽馳往南北岸分布迎截復擊其半渡賊奔潰乃夜赴洵陽先後殲擒數百救出難民甚夥撥倉糧散給民心大定得旨嘉獎下部優敘尋而楚匪竄近平利承惠於黃花河等處擊斃數百人生擒數十人升陝西布政使時川匪屢入陝窺楚承惠禦之數有斬獲先是陝西巡撫陸有仁奏言築堡團勇之事漢北山內近已一律興功其西安同州鳳翔三府與漢南附近川省之區皆多土著審利害每邑結有堡寨或百餘或數百恐結寨後民丁但知守寨而於賊出入要隘轉無堵禦復令於堡寨之外每寨撥數百數十人合力守下以杜窺伺請將五郎孝義藍田盤匡鄠縣五處責成臬司商州鎮安雒南山湯商南五處責成潼商道平利

安康白河洵陽紫陽五處責成候補道石泉漢陰城固洋縣西鄉
五處責成延榆綏道鳳縣留壩褒城沔縣寧羗略陽責成陝安道
得旨允行至是叙修築堡寨暨捐購兵勇衣履功承惠與焉十一
月諭額勒登保曰賊匪思趨楚境看來溫承惠在陝祇能防堵究
不能跟踪追擊又諭總督長麟曰溫承惠雖在平利安康駐紫賊
至則帶兵堵禦賊去則安坐且文員亦未必能臨陣殺賊著酌量
是否必需伊駐守若無須該員卽令其回省辦事長麟覆奏承惠
在安康平利一帶防堵爲時最久頗爲熟悉且仍留協勦其年春
偕總兵喜明敗賊於平利復隨巡撫陸有仁籌運糧餉捐廉置官
兵衣履上皆嘉之大功底定下部優敘調江南布政使尋擢江西
巡撫調福建巡撫署直隸總督旋以林清傳教已久承惠未能先
事訪拿復不自請處分坐此褫職久之起爲山東按察使授湖北

布政使道光元年以年力就衰罷爲戶部郎中乞假回籍十二年卒承惠督直隸最久其勞動則防堵山南爲獨著云

清史本傳
參聖武紀

圖薩布滿洲正紅旗人姓瓜爾佳氏由筆帖式中乾隆三十三年舉人授兵部堂主事擢工部員外郎陝西督糧道調漢興道甘肅蘭州道撒拉爾逆回蘇四十二滋事犯蘭州圖薩與候補道永慶捐資募夫晝夜親督防禦得旨嘉獎賞戴花翎交部從優議敘尋調陝西督糧道署陝西布政使旋實授甘省鹽茶廳逆回田五滋事據石峯堡奉旨派京兵一千名赴甘堵禦其經過陝省供應事宜諭令圖薩布沿途照料因奏言京兵抵陝尙需時日其一切供應俱已密爲妥備擬先馳赴鳳隴一帶查各隘口及如何分兵設卡並將所需官兵口糧馬匹草料通盤查覈不敷即就近撥運協濟隴州距省五百餘里數日即可回省仍當趕赴潼關照料京兵

入境又奏隴州汧陽麟遊三處重兵食指浩繁兵民俱多未便且見調滿漢及各省綠營官兵相距原營均有數百里至千餘里不等裹帶勢難常繼差取未免寫遠蔬薪雜用日所必需似未便拘泥成例臣已飭知各該處將官兵應得口糧或日給本色或折支炒麵統於常平倉內動支並於司庫酌借銀一萬兩借給於各弁兵應得俸餉內扣還仍隨時查覈接濟疏入上俱嘉之尋擢湖北巡撫調廣東巡撫暫署湖廣總督八月抵廣東任復命兼署粵海關監督久之以病懇請解任允之回旗卒

清史本傳

台斐音正黃旗蒙古人由繙繹舉人於乾隆四十四年考授國子監助教久之分發甘肅以同知試用豐任莊浪同知直隸承德府知府授圍場總管賞戴花翎擢口北道調熱河道嘉慶二年擢陝西按察使時邪匪李全等滋擾省西一帶台斐音抵任後卽馳赴

子午谷夾嶺等處督率員弁加意防範擊賊於夾嶺以南斃三百餘名餘匪南竄復偕遊擊龔鐸兩面夾攻勦洗淨盡得旨嘉獎張漢潮股匪竄至孝義藍田台麥音督同文武嚴密防禦並預備各路軍火糧餉又川餉接踵過陝行近鳳翔時賊匪張映祥由秦州竄至隴州之赤沙香泉地面台麥音以賊勢切近飛飭隴州汧陽鳳翔寶鷄等處厚集壯勇防堵仍飭參將海洪阿帶兵馳往寶鷄並飭潼商道吳沂將副將四達色帶赴商雒協勦之山東官兵一抵潼關卽改由大路行走既可護送川餉且爲西南一路聲援上嘉之陝甘總督松筠以五郎孝義鎮安三廳縣爲賊匪往來必由之路居中扼要須幹員董率奏調台麥音赴五郎駐劄尋擢廣西布政使調陝西布政使總督長麟因子午谷整屋所屬之黑水峪西駱峪辛峪一帶無官兵防守飭令台麥音率領各員檢派壯丁

嚴密布置尋坐於鎮安五郎等處糧運辦理未能妥協撤去花翎
降爲鳳邠道復命署陝西布政使時黃河漲漫朝邑縣城內水深
一丈有餘民房田禾被淹命會同潼商道吳沂分投確勘尋奏因
見辦軍糧於查勘後卽面交吳沂悉心辦理仍兼程回省經理軍
需事務上是之復偕巡撫陸有仁等捐廉備辦衣服解送軍營上
以其急公可嘉交部議敘後以督修斜峪關華陽營各工程首先
飲限完竣賞還花翎遷湖北布政使旋坐事降調繼復賞三品頂
戴授河南布政使護理河南巡撫時匪徒李文成等滋事台斐音
帶兵往勦因督辦軍需無誤經直隸總督那彥成保奏諭交吏部

議叙尋授廣西巡撫二十年二月卒

清史本傳
卷武記

李用清字澄齋一字菊圃山西平定州人髫年勵志文行讀書不
泥章句咸豐八年舉於鄉同治四年成進士改庶吉士散館授編

修加侍講銜記名御史授廣東惠州府知府升貴州貴西兵備道
貴州布政使署貴州巡撫光緒十二年再起爲陝西布政使蒞任
後飭南北山各屬設救荒倉廣屯穀粟却平餘不受捐以爲公費
又嚴禁罌粟播種暨吸食者嚴懲不貸並以粉塗犯者面製別種
衣服遊於街市以恥之尋令開缺來京嘗言天下大利必歸諸農
輕農學而重商學是取貧之道也又言洋米洋布充物內地皆由
小民以錢爲重以布帛菽粟爲輕又言致荒之道在不種穀而種
煙其任貴州巡撫時禁種鴉片尤力卒以蜚語未竟其用再仕再
已未嘗有幾微不平之色在陝西藩司任內以鄭州河決捐銀二
萬兩奉旨賞給頭品頂戴並賞戴花翎家居主講河東晉陽書院
凡十年其教人也以存誠爲首務其律已也以主敬爲指歸晚年
喜讀易曰易之爲道即在日用不必求之過高聖人以爲寡過之

書有以也每朝廷有黜陟及因革大政輒中夜徬徨不自已有言不在其位不謀其政用清曰天下事須痛癢相關吾固不能忘也又曰士人在家先讀不痛不癢之書當官自作不痛不癢之事以中東之役時事日棘隱憂私憤馴至不起瀕死而誦板之卒章曰敬天之怒無敢戲渝敬天之豫無敢馳驅其志可悲已用清雖居顯要不忘儒素光緒丁戊山西大饑用清奉旨襄查賑務周歷郡縣往往步行盛暑祁寒曾不少間其講學也於朝師倭文端於野師薛仁齋自以爲不數覲也卒年七十

續碑傳集李公嘉誌
光緒東華錄

李有棻字報春一字薌垣江西萍鄉縣人同治癸酉由優廩生考取拔貢廷試以內閣中書用充玉牒館漢謄錄官保知府分省指分湖南署沅州府知府授湖北襄陽府知府署安陸調補武昌以鄂督張之洞密保授廣東高廉欽道辦理欽州防務有功賞二品

頂戴並賞花翎光緒二十年授陝西按察使抵任後首先整頓保甲詳定章程一十四條大旨以選擇得人辦理有序化散爲整毫無騷擾爲主而其歸則在保甲編清之後聯絡義團爲寓兵於農之計其南北山煙戶畸零不成村落者或三村編爲一牌或兩村編爲一牌附入就近之大鎮村市歸某里某甲長稽查以昭簡易頒行後山內各廳州縣咸稱便盜賊斂跡商旅夜行民間稱頌焉尋署陝西布政使稽覈各屬倉儲興修二華水利並釐定官錢局章程一時廢墜修舉屬僚敬憚官廨供役者只一老僕司門戶各衙門送批判文書者皆徑達衙齋有茶審閱後旋即批繳絕無承轉延擱之患數年如一日也尋回臬司任繼復攝藩篆值朝廷厲行新政於是陝西創設籌辦文武學堂公所督練新軍處昭信股票局萬緒千頭有茶從容籌措遴選人才群策群力出以誘掖獎

勸樊增祥周銘旂尹昌齡張世英周丕紳楊宜翰諸人均明習吏治者幕中丁禧翰趙長鑑亦皆博通之士有禁朝夕延見商度咨詢一有善策立即宣布無頃刻閒殷殷圖治之衷昭然若揭最後設秦中書局彙報刊發官行文字且復今古並蒐舊新借采無町畦門戶之見陝右之有公報自有禁始也二十四年實授陝西布政使二十五年護理陝西巡撫時畿輔山右拳匪已蠢蠢欲動有禁飭團防禁會黨籌備荒之策立正學之規方欲有所敷陳會以母喪去任服闋後補江甯布政使護理兩江總督尋命督辦萍鄉礦務緣事乘江輪東下忽遭風船破而殞年未逾六十事聞贈卹如例子豫翰林院編修復陝西候補知府

秦中公報
參探訪冊

按察使

秦勇均字健資一字柱川江蘇金匱縣人中乾隆甲辰舉人補內

關中書己未成進士殿試第三人授翰林院編修改官江西九江府知府調廣信府知府丁憂服闋授山西平陽府知府二十七年七月授陝西按察使在任九年以老疾乞歸卒於商州旅次年七十一勇均長身噩立美髭鬚與人交坦中任真始終如一雖以文學受知高廟而未遇時曾游幕習刑名故歷外任二十餘年所張弛條奏無不上俞下頌按察陝西時長武縣民尙景福等強借籽種毀書役廬舍勇均審知皆饑民非盜也殲厥渠魁餘皆省釋某縣有案相似參將許承麟將以盜報勇均往止之申辯良久許不可勇均忿而歸須臾許求見長跪謝曰頃公所言老母在屏後悉聞之責我不聽仁人之言怒而不食今我受母命來承公教矣遂徒一人杖三人而案以定律載殺死一家非死罪三人者斷給財產殺二人者不在此例勇均奏一家中雖人數不一然已殺二人

則其中豈無孤寡儻屍主登登無告而兇犯妻子仍擁厚貲於義
何當嗣後凡殺一家非死罪二人者亦請給與罪人財產一半上
深然之載入則例中勇均雖用法寬然於大猾無所縱如葭州衙
差大荔高陵兩縣之積匪某皆以罪浮於法特置重典所到處葺
橋梁崇書院禁溺女恤災稜以故耆民髦士皆迎拜車前歌呼祝
延分校已丑會試得李因培張紹渠等仕至公卿識拔靈石縣武
童何道深官貴州遊擊王師征緬時死錫箔之戰崇祀昭忠人歎
其知人之明子鼎雲拔貢生

善獻類徵秦
君嘉誌銘

王昶字德甫一字述菴江蘇青浦縣人乾隆癸酉舉於鄉十九年
成進士歸選班高宗南巡召試一等欽賜內閣中書累官至直隸
按察使四十八年調陝西按察使奏稱向例重犯脫逃州縣先於
本境查拿初參限滿不獲始造具事由清冊分咨鄰省通緝查命

案初參以半年爲限閱時既久頑獷之徒早已乘間遠颺請嗣後
遇有兇犯脫逃一面在本地嚴拿一面飛咨鄰省通緝得旨依議
速行又奏陝西省幅員遼闊東南與楚蜀接壤最易藏奸見飭各
屬將舊有保甲逐一清理漢中興安一帶流寓民人取具相識保
結方准棲止其無人認識蹤跡可疑者遞回原籍至往來過客於
歇店給發印簿循環稽查如重犯曾在該店歇宿照例治罪再兇
器必宜禁絕除烏槍業已陸續收繳其餘順刀禪刀不惟不容佩
帶並不許製造仍飭各屬嚴密稽查毋任胥役藉端滋擾得旨實
力爲之甘肅固原屬鹽茶廳回民田五阿渾倡復新教攻破靜寧
州阿渾者回語通經教主之稱也奉旨以靜寧州距陝西長武六
站恐回匪竄入命王昶率兵至長武防禦未幾田五自戕死餘黨
張文慶走會寧長武勢弱賊勢甚張昶乃借兵於總兵三德得兵

三百令通判黃秉哲率領以來椎牛享之分撥城內外聲勢稍壯
民心乃安時副都統明善參將孫受戰失利沒於陣賊勢大熾距
長武不及三百里昶乃試砲巡城爲防禦計數堞分人籍城外民
強壯者識其名如有急入城協守凡刀矛礮石鎗燭油米悉具無
缺民恃以無恐邠乾永壽皆鑿塹填門而長武樵採往來自若也
賊知有備不敢犯與石峯回匪據隘以守會上命大學士阿桂戶
部尙書福康安領侍衛內大臣都統海蘭察工部尙書復興將軍
莽古賚阿拉善王親班巴爾會師隆德將一舉而殲焉賊首馬文
熹懼率衆降諸軍攻勦斷賊水道賊勢蹙欲突圍出海蘭察率兵
邀截殫無算於是阿渾張文慶李可魁馬四娃等皆就擒餘黨悉
平是役也用陝西綠營及駐防兵五千名外調山西兵二千京兵
二千絡繹過長武需車輛馬騾約以萬計而銀錢火藥槍礮軍裝

裝馱載者又以萬計昶不攜胥吏不藉賓僚草檄飛書無一舛誤
有旨嘉許尋署陝西布政使遷雲南布政使時河南伊陽縣民秦
國棟等三十餘人戕知縣孫岳灝逸去巡撫畢沅搜捕不獲因奏
言伊陽接壤湖北陝西恐由熊耳諸山遁入商維得旨派昶前
往督緝乃赴商州檄州同李景蓮邏緝奉旨仍令留捕事竣入都
陛見未幾景蓮等獲秦國棟解京師即命入京陛見請改京職溫
旨不許遂之任久之授刑部右侍郎以年力就衰命以原品休致
卒年八十有三昶屢充考官皆以經術取士治經與惠棟同詩禮
宗毛鄭易學荀虞言性道則尊朱子下及薛河津王陽明諸家居
憂不爲詩文不就徵聘平生重倫紀尙名節篤棊之誠本於天性
著有金石萃篇一百六十卷明詞綜十二卷國朝詞綜四十八卷
湖海詩傳四十六卷春融堂詩文集六十八卷續修西湖志青浦

縣志太倉州志陝西舊案成編雲南銅政全書皆刊行於世子肇

和

清史本傳參看
類徵漢學師承記

嚴如煜字樂園一字炳文湖南淑浦縣人少從學鴻臚寺少卿羅
典究心輿圖兵法星卜之書乾隆五十四年學政張姚成以優行
貢成均黔楚苗變湖北巡撫姜晟聞如煜有幹濟才延入幕多所
贊畫嘉慶三年舉孝廉方正時川陝楚教匪方熾制策平定三省
方略如煜奏對幾萬言名第一次日傳至軍機處詢屯政復奏上
應辦事宜二十條召見以知縣發往陝西總督長齡委赴南鄭城
固褒城三縣地方結寨練勇旋補洵陽縣知縣如煜勤於聽斷日
坐堂皇治事或因公詣鄉有赴愬者立馬訊結又以縣宅萬山中
與湖北之鄖西竹溪陝西之鎮安白河毗連官兵追賊急往來折
竄皆道洵陽如煜率民築堡練勇戒勿迎擊抄其尾擾其疲豫儲

糗糧於衝要以待官兵督寨勇生擒賊帥陳明覲於陣又與官軍夾擊張天倫張三標熊翠等於太平寨經略額勒登保參贊德楞泰上其功詔加知州銜賞戴花翎後擊斃楚北逆匪二千餘人於蜀河口斬賊帥王詳擒賊目方孝德命以同知直隸州卽用補定遠廳同知如煜以其地爲全陝門戶乃創建新城捐修城垣七閤月竣功復於廳之西南百餘里擇要地黎壩漁渡壩二城置社倉三所團練武備如治洵時先後擒賊目陳心元馮世周等巡撫方維甸奏請賞加知府銜丁生母憂服闋仍發陝西以同知用補潼關廳同知擢漢中府知府先是寧陝新軍移駐郡城民困兵驕如煜視事聯營伍立保甲朔望周歷城郭宣講科律問民疾苦農事興撤蓋行赤日中獎勤懲惰行區田法製紡車式俾民務耕織饒生計漢郡田疇向資渠堰灌溉小堰不下百餘其大者如南鄭之

山河堰城洋之五門楊填二堰各灌田數萬畝如煜履勘形勢與紳耆講求疏蓄敵閉水利均沾在南山既久亭障要隘村砦徑路曲折無不口講指畫而心縈繚之窮鄉邃谷老兵婦孺皆識其姓字自宰洵陽以來戎馬倥傯與諸生投戈講藝及典郡漢中舊有書院以軍興改爲行館如煜首出廉俸並勸捐數千金充修脯月米之資拓基址建講堂齋舍仿鹿洞蘇湖學規五日一臨躬親講授文風丕振得其指授以科名起家侍從牧令者數十人然勞於治民拙於事上嘗以歲暮卜築寧陝新舊二城歸而南山晚收大歉已逾請賑期如煜於元旦趨撫轅乞棄官爲百姓請命巡撫董教增素重如煜爲破例奏獲請諸要事多就與議及教增旣去如煜愈益勤懇飭吏治體民隱於是名滿秦楚間十餘年而官卒不遷寧羗山中有楚北王姓以饑民乞食爲名聚衆劫掠如煜星馳

至州誘擒餘衆榜示歸業城固民人陳義習圓頓教與京師民婦
高張氏通密書相勾結事發如煜往緝但治從逆釋其株連者人
心帖服復以防範岐郿匪徒供運軍餉著績得旨加道銜尋授陝
安道會廷議以川陝楚接壤州縣應添文武營廳爲綏靖邊疆計
四川總督蔣攸銘奏委如煜查勘如煜自川入楚反陝數千里相
度形勢析官移治增營改汛條列井井奏入報可於是建置城口
白河甄坪太平四廳縣丞倅營制有差尋復設佛坪廳移駐文武
員弁而三省邊防始固道光三年諭曰陝西陝安道嚴如煜在陝
年久於南山情形甚爲熟悉該員任事以來地方安靜洵堪嘉尙
著加恩賞加按察使銜以示鼓勵陝西巡撫盧坤以如煜素諳溝
洫蒞漢著有成效欲溥其利於全秦檄視豐涇涇渭諸川鄭白龍
首諸廢渠規畫俱備尋授貴州按察使調陝西按察使召見三次

新陝西通志卷之六十一
十一
詢十年不調之由上嗟歎久之歸途感微疾抵任七日卒道光六年三月初二日也事聞贈布政使銜陝民籲請祀名宦湖南人亦請入鄉賢祠上均允之如煜營佐兩廣總督那彥成籌海寇著洋防備覽佐湖南巡撫姜晟湖南按察傅鼎籌苗著苗防屯防備覽其任漢中道府時又著三省邊防備覽皆爲有用之書又著有漢中府志四十卷樂園詩文集若干卷子正基官至京堂正坊候選

府經歷

清史循吏本傳參看獻類
徵嚴公墓誌銘神道碑

黃彭年字子壽貴州貴筑縣人原籍湖南父輔辰任陝西鳳鄠鹽法道別有傳彭年由監生中道光癸卯順天鄉試舉人丁未成進士改翰林院庶吉士散館授編修其後陝西巡撫劉蓉聘主講關中書院兵燹後士鮮知學彭年講明實學廣置書籍嚴定課程學者漸盛尋直隸總督李鴻章聘修畿輔通志成書三百卷旋主講

保定蓮池書院置書定課一如在關中時選刊蓮池肄業生日記三十二卷久之授湖北安襄鄖荆道調署督糧道旋回本任尋調陝西按察使權陝西布政使創博學齋延宿儒主講席購補關中書院書籍以牧令多不諳律例設學律館人給律例定期會講又憫愚民不知法摘律例中民間易犯各條刊布簡明告示使知敬懼陝省自回亂後會匪遊勇潛相勾煽彭年整頓保甲明連坐之法嚴窩賊之禁詳定就地正法章程擒誅巨魁張鐵梅等數十名又以城中失火易致延燒捐置水桶水缸令居民數家共穿一井有警則通力撲滅由是火患以熄長安縣馬營寨等六十餘村地濱灃渭值秋霖水暴漲決隄堰壞民田廬無算彭年捐廉集款賑撫修復民賴以安尋擢江蘇布政使調湖北布政使抵任甫兩月卒於官彭年邃於學著有陶樓文集十二卷詩集若干卷東三省

邊防考畧金沙江考畧歷代關隘津梁考畧存銅運考畧等書

清史

循吏本傳參陶樓
文集朔方備乘跋

諸道

王太岳字基平直隸定興縣人乾隆辛酉舉於鄉次年成進士改翰林院庶吉士散館授檢討屢遷侍講侍讀授甘肅平慶道二十三年調西安督糧道在任十年擢湖南按察使調雲南按察使擢布政使以審擬逃兵寬縱落職命充四庫全書館總纂官尋復檢討升國子監司業卒年六十四太岳以弱冠入詞林海內盛推其文學而尤篤志於經世之務所至必搜爬剔決據今考古咨民之疾苦而討論之在平慶及西安皆有惠政及民尤留心於水利著涇渠志三卷畧謂今之龍洞則明之廣惠故泉也渠之水則上下之散泉也因其已成不別事穿治矣收其迅走不便勞陂堰矣於

是決疏泥淤完治隄岸不過費縣官錢數千計而此數十泉者固已冲灑浩衍合能效技以畢輸於渠而流潤於四縣以視昔人鑿山衍水力愈勤而謀愈拙者豈特事半功倍而已若乃役由私僱而無調發期會之煩官自購材而無糾率抑配之擾役興而人不知豈非萬祀之永賴者乎然是泉也項襄毅實嘗鑿而出之龍洞以南衆泉并列則尤非旦夕之所可得而昔之人莫有爲之計者徒以引涇之利熟於耳而盤固於胸臆雖有他便利至於倍蓰什百而莫與易焉故交臂而失之也嚮使早知變計如今日則將遠引深閉以拒涇而不暇尙何穿山治堰亟困其民而不已哉然今日之計亦有當急者曰謹視隄壩而已諸壩之制惟洞口爲非宜聞之故老順治間金漢鼎實始爲此乾隆二年之壩特因之耳金之始爲渠蓋猶覬欲引涇旣而知其不可引也而見洞中之泉亦

足以會衆泉資灌溉於是始慮濁涇之敗泉而置壩以拒其入顧猶低徊顧戀僥倖於涇之萬一可引而姑留洞口之跡以不沒其舊此惑者見也夫洞口之鑿欲引涇也然而常時則涇不受引比其漲盛而濁汙乃足以敗泉然則洞口者揖盜入室之計也自順治至於今又百餘年矣涇流去渠口又益下矣渠泉之爲利較然明矣此其與涇誠有不兩存之勢尙何洞口故蹟之足留哉謂宜毀撤此壩以巨石堅塞洞口視其損敝而時葺之使濁涇不得涓滴入洞泉不得涓滴出則壩之北尙有泉二三孔可以益渠以大其利所謂拔本塞源計無有急於此者矣若大小退水槽兩閘水磨橋大王橋廟前溝渠右各壩皆清濁之要限出入起巨防並須官自檢察不以寒暑輟按行不惜小費賞罰持久不懈功利滋多此日計不足月計有餘之道也言經兼訓詁論學兼取陸王詩宗

魏晉下及唐人純古淡泊時稱高格初好爲駢體文見邵齊燾作
歎爲天授遂輟不作而規史漢及韓柳氣格高簡卓然名家在雲
南閱銅政之弊補救釐剔厥功甚偉滇人祀之七賢祠著有清虛

山房集芥子先生集凡二十四卷

清史文苑本傳參看類微
王芥子行狀紅豆樹館詩話

王鏜字春融山西鳳臺縣人乾隆七年用薦者召入授戶部員外
郎尋擢郎中改刑部二十三年授陝西延綏道會沿邊州縣歲屢
旱鏜力賑之其不成災者出俸錢市米煮粥分廠撫恤千里之人
無流散者西師興奉文採辦駝隻上郡烏延素非所產前官皆飭
屬吏代辦鏜謂邊吏力絀不可再擾乃捐俸遣簿尉分路遠近購
送軍營至馬政邊儲羽書如蝟鏜心畫手揮寢食俱廢制府以鏜
才可大用奏令攝榆葭道併歸延綏兼轄而駐節榆林報可榆林
帶河襟隴南枕京兆北控沙漠保障全秦地當衝險鏜率數騎襄

帷按部問疾苦除豪猾桴鼓不驚苞苴盡絕邊人迎之如親父母
然鏜日瘁而病且深矣雄石峽爲一郡奇境鏜勸農至其地忽忽
不樂一日晨起判牘如常卓午至射圃發數矢釋弓而笑俄頃痰
湧遂暴卒時乾隆二十六年二月也鏜爲人寬厚有容不事谿刻
居官竭力公家戒操切持躬謙謹然意氣豪邁樽壘絲竹輒以自
隨家本素封自鏜筮仕後漸落沒後尙虧帑金二十二萬餘兩兩
子稚不能理乞罄產變抵晋撫入告上惻然降溫諭謂不忍厥子
無以資生飭長蘆鹽政別委富商代理分年納帑歲給千金贍其
孥仁恩矜恤迥逾常典詔下之日天下皆爲感泣云

善獻類徵王
君聲誌第參

榆林府志

石韞玉字執如一字琢堂江蘇吳縣人乾隆己亥恩科舉於鄉次
年成進士殿試進卷置二甲第一高宗特拆置一甲一名授翰林

院修撰充福建正考官旋督學湖南未散館而簡放學政前此未有眞異數也任滿還京命在上書房行走是年冬京察一等授四川成都府遺缺知府補重慶府知府兼護川東道三省廓清先後奉旨加道銜賞戴花翎十年擢陝西潼商道值歲洊饑晉中荒歉尤劇米石值白金十七兩或請禁陝米出關韞玉曰晉人亦朝廷赤子吾不能爲陝遏糴令饑餒縱之晉人得食而關中人亦獲厚利升山東按察使瀕行巡撫方維甸訪以治陝何者爲急韞玉對曰往者長制府以各州縣采買倉穀累民奏請永禁所謂累民者不過年豐有穀之家不得善價耳其患猶淺今禁之則倉廩空虛遇險歲及軍需倉無積儲州縣何以應命方撫以爲然遂奏請弛前禁及韞玉赴熱河行在謝恩適寧陝新兵滋事召見二次言必及軍務韞玉多所陳奏事歲皆一一如其言抵山東臬司任兩攝

藩篆坐事被劾部議革職仁宗念川省軍營勞績賞給編修命在
國史館行走韞玉因從軍時受山巒瘴氣得軟脚疾至是復作引
疾乞歸里居二十二年卒年八十有二韞玉仕陝未及半載而其
請方撫開州縣採買倉穀禁實能持裕民足國之本計左氏傳云
仁人之言其利溥哉石氏有焉著有袁文箋正十六卷行於世所
爲文貫串今古尤長於經世之學詩破除門戶援筆立就著有獨

學廬詩文集爲海內所稱云

清史文苑本傳參看
石君墓誌銘及鄧潛紀聞

查崇華字九峯一字實菴安徽涇縣人乾隆中入福州將軍魁倫
幕府援例以通判留閩巨盜蔡牽就殲以功給五品頂戴花翎尋
諭降南洋盜朱渥署臺灣淡水同知以道員謁選二十二年選河
南南汝光道丁母憂去官道光二年遷陝西鳳邠道張格爾擾新
疆南路調主嘉峪關軍需局事自川楚軍興費帑不貲與軍事者

莫不饒沃將吏習川楚故事支銷多重複崇華不避嫌怨覈實應
付大兵出關時僉謂當僱長馬駝送軍裝崇華曰內地馬不習關
外寒苦必多倒斃且關外臺站皆有伺應關內長僱到彼不適用
唯增餽養費開銷重沓不便議者無以屈遂節帑二百餘萬事戡
敘功加按察使銜崇華在監司任內攝豫臬一攝秦臬三凡案有
疑竇皆於初詳指駁使屬吏得覆審更正招解後無復翻異以故
得依限完結官民胥免拖累焉官秦十二年先後決大疑扞大患
飭官方以甦民氣靖伏莽以奠民生皆持大體不動聲色洎當刑
名總滙地雖能者苦叢脞而崇華卒未嘗以公事望吏議其謹細
慎微檢點周至又有如此者卒年七十四子德基同知銜江蘇卽
補通判德本候選布政司經歷

續碑集查
公神道碑

黃輔辰字琴鵬貴州貴筑縣人原籍湖南醴陵道光乙未成進士

以主事分吏部游擢至員外郎中截取知府分發山西旋以捕斬
亂首羅憲章等有功以道員用並賞戴花翎兩署冀寧道加鹽運
使銜會回逆擾陝中地荒殘無耕者陝西巡撫劉蓉請興營田初
蓉爲四川布政使知輔辰賢嘗以書詢屯田事宜輔辰爲陳十二
難又採錄官私書爲營田輯要三卷大旨在用民而不用兵與民
興利而不與民爭利書中言成法十有七言積弊者十有四至制
田物土之宜皆博採而詳說之於用人得失尤三致意焉至是奏
輔辰心術正大吏事精能堪勝營田之任得旨後卽以西安同州
鳳翔延安乾州邠州鄜州七屬營田事委之輔辰建議謂關中土
曠人少非招徠客民事莫由濟然墾荒所需耕牛籽種農具棚舍
之屬一有不備民不樂趨也則莫若卽以地畀之薄收其租畝二
斗爲差六年屆滿則給券使世其業然慮田無限制賦無定則吏

得以意高下爲民患當先正經界略如古井田法量地百畝爲段編列次第書賦額多寡於券視土肥瘠別等則上下授之凡領墾者以先後爲次自一至十毋越其序十段爲甲十甲爲里置長焉里長總十甲租課歲輸之官凡移徙更替事皆責之別授田六畝俾食其入爲庶人在官者之祿而官總其成因詳定章程十一條令下民稱便復定考課舉劾章程四條以策奉行不力者葺年凡墾田十八萬餘畝時回捻交江援兵雲集賴營田租麥軍食無缺又編查保申嚴辦省防奸宄不得逞民獲安堵長安咸甯舊有義學四所亂後久廢書院例歸鹽道經理輔辰捐廉倡復之親臨勸課撥公產給闕中書院米薪士林競勸復修養濟院育嬰堂種痘局以至灞岸隄渠各工次第具舉尋卒年六十有九劉蓉以輔辰積勞病故遺愛在民列其事上之諭曰已故陝西鳳邠鹽法道黃

輔辰歷官中外二十餘年其忠君愛民之忱極宜嘉獎著准其入祀陝西名宦祠並將該故員政績宣付史館編入循吏傳子葆謙國子監生彭年官湖北布政使別有傳孫四人國瓊湖北候補同

知次國瑾國瓌國瑄也

清史循吏本傳續碑傳集黃君墓表及墓誌銘

黃鼎字彝封四川崇慶州人幼有志節弱冠入庠值滇逆擾蜀仗劍謁總督駱秉章於軍門面請身入賊營曉以大義勉其自新或可有效即不然亦可翦其羽翼秉章許之居無何從賊中竟攜壯士數十人以歸並謁布政使劉蓉言賊可平之狀口講指畫旁若無人劉蓉知爲奇士薦於制府檄募民兵五百人往勦蠻獠鼎到一戰賊即披靡遂討平之是爲彝字營建績之始自同治二年至七年疊著戰功屢解城圍授陝西陝安道及奪回董志原陝境肅清有旨以按察使記名及馬化澂父子伏誅賞穿黃馬褂在隴防

數載勸農課士風化以端尋調防陝西北山居民涕泣請留鼎爲稽留信宿而後行到防後分別部署轄境以甯無何丁父憂乞開缺回籍終制巡撫邵亨豫以陝防吃緊深資倚任復奏留辦理防務仍赴北山防所北山自兵燹後百姓逃亡商賈歇業鼎召諸將面授約束劃疆分理各專責成法令嚴明不稍寬假又以北山瘠苦呈請大府採買耕牛一千餘頭羊八萬餘隻農具千餘件攜散各邑按名分給每春耕日行歷鄉村察勤惰呼父老教以樹藝諸法勉勵獎勵居民亦自相鼓舞由是延榆綏二十餘州縣賊匪斂跡農業盡復商旅在途景色爲之一變及由川葬親還仍駐軍瓦窰堡興學課士庶務咸脩大學士陝甘總督左宗棠方謀檄調鼎軍出關助防勦忽部下有湯炳勳者伺鼎假寐入室刺殺之奏入奉諭陝西駐防北山統領蜀軍前陝安道黃鼎帶兵剿匪疊著戰

功迨調防北山於地方一切事宜復能盡心籌畫正資得力乃突
被營弁湯炳勳挾嫌行刺以致受傷身故殊堪軫惜該弁湯炳勳
兇惡不法業經拿解到省着於審明後卽行正法二品頂戴記名
按察使前陝西陝安道黃鼎著交部照按察使陣亡例賜卹其後
護理陝西巡撫王思沂據紳士師長灼等請奏懇予建專祠由地
方官春秋致祭以彰忠節而順輿情得旨允行至今陝民祀之

東華

錄參莽軍紀畧關隘
思危錄越緩堂日記

江滙川字海颿湖北鄖陽縣人廩貢生同治元年以在籍率團守
城有功保儘先訓導署襄陽縣訓導經陝甘總督楊岳斌咨調西
征隨營差遣疊以戰績保知縣同知直隸州擢知府賞花翎引見
發陝候補歷署富平安定靖邊知縣西安甯陝同知其署安定也
兵燹以後城無居人滙川始集流亡還定安集訓練民兵搜剿餘

匪又復貸錢買牛借穀作種鄰縣保寨無分畛域凡叛產荒地無人耕種者招撫南山客農攜眷開墾其初至也荒田滿目閭邑僅數百人三年後墾地十四萬畝戶口增至數萬人其在富平寧陝亦有政聲而安定尤卓卓可紀由牧令以至監司勵精圖治數十年如一日豐署鳳郿鹽法道旋奉旨實授在監司任十有餘年於州縣利弊無不洞悉凡事認真百廢俱舉生平講求吏治如裁陋規節差徭興學校務農桑振工商濬渠塘一以開通風氣舒展民力爲宗旨故民教相安而盜匪斂跡陝省鹽道向管書院建置膏課等事滙川每遇課期必延需次人員中之有文望者共同校閱賞奇析疑孜孜無倦文讌終日往復評論嘗有游城南雁塔圖徵題迨遍猶見昔日承平之雅尙焉性好解推遇有各省偏災即傾囊施助毫無吝色旣解任目賭秦晉災重復慨然捐助二千金自

奉極薄官秦最久多感恩澤卒於陝西省第身後子孫僅能餬口
陝西巡撫曹鴻勛奏將滙川生平政績宣付史館立傳列入循吏
以順輿情而資觀感得旨允行子二貢金安徽試用同知雲鳳甘
肅山西知縣宣統初復改官陝西孫二萬鵬萬鶴

光緒乙未奏疏
便覽參關中同

官錄探
冊

唐承烈字冕周山東鄒縣人初以議敘同知蒞四川歷署馬邊廳
同知瀘州知州補甯遠府知府調成都坐事褫職四川總督鹿傳
霖爲之前雪奏請開復得旨仍以知府用光緒二十四年改發陝
西承烈識沈才練究心經濟之學大府器之委充善後局提調代
辦全省營務處二十六年拳匪肇亂訛言四起大河南北糜爛不
堪承烈陳明撫部力主查禁訪獲三原縣習拳仇教者數人訊明
立置諸法有密告長安回民欲乘機作亂者保甲局因議令回民

盡繳兵器承烈立見當道者深言回民皆有身家決無叛志若迫收兵器適啟其疑恐公家有勦洗之計奸民煽之轉虞激變切不可行其事遂寢由是群情安謐關輔無驚七月聯軍入都兩宮西幸署巡撫端方特任承烈總支應事務期迫事繁於三十餘日中督率員司一百四十餘人修理行宮二所設備大小行館五十餘處措置悉宜地方無擾且嚴拒太監非分需索婉謝親貴例外要求翠華蒞陝經年一切建築供應僅開支六十萬金爲國家節省甚鉅其時又值大稜兼總籌賑局務待賑者六十七州縣待食者二百餘萬人承烈鉅細必親籌畫精到日不遑食夜不遑寐每晨衙參必詳商院司推求溥賑之方卒能呼籲徧華夷捐集幾於億緡民得實惠全活實多尋署鳳邠鹽法道創設洋務總局遇有交涉數語折之輒解又署陝安兵備道拿辦南鄭蠹役朱榮百姓稱

快尋署陝西按察使開辦陝西警務總局規畫井然始基已裕未幾朝廷派柯逢時督辦八省土藥統稅奏委承烈辦理陝甘統稅事宜承烈本以征爲禁之意爲拔本塞源之謀運以精心期收巨效而積勞已甚遂以三十二年卒於差次年五十有七承烈生平公明廉靜文武兼資政治講求孜孜勿懈方其辦土藥膏捐也大學士鹿傳霖時在樞廷電達逢時曰承烈器識宏深堪任艱鉅當行在時供張籌賑深資得力不審國家何以忘之仍當入告丐予大用耳無何竟以沈疴不起惜哉子四長紹臯官知縣次紹爽等亦皆能以仕學世其家

續修陝西通志稿卷六十八

名宦五

知府

喬光烈字潤齋江蘇上海縣人乾隆二年進士以知縣分陝西即用尋授寶雞縣知縣勵精圖治寬猛相濟教民植桑以供蠶績每於春月勸農親載酒漿饋餉南畝今金陵店尙有遺跡時奉檄修棧道始議自寧羌州之七盤關至寶雞之二里關全行煨鑿光烈以爲仍築偏橋不宜全用煨鑿致費國帑路成行旅便之尤留意於學校創雞峯書院各鄉俱設學招諸生月課併卽佑德觀內捐俸延師講學論文多所成就攝篆臨潼七十餘日除弊殆盡明察而恕卓有清操調渭南縣知縣遷乾州直隸州知州乾民農而不桑光烈教之樹畜桑林蔭醫有幽國之風無何遷同州府知府以

歲早上巡撫陳宏謀書請由黃河上游運粟至同以資賑濟又議以查勘黃龍山界在七邑之中爲延榆綏鄜通衢大道宵小乘間難保必無且延鄜之鹽越境赴同屬私販犯者屢屢請添巡檢一員駐紮其地期於控制得宜寧民靖匪大府均如請行之尋以其廉直上聞擢山西河東兵備道升直隸按察使河南布政使二十七年遷貴州巡撫旋調湖南坐事革職復起爲甘肅布政使三月卒著有最樂堂文集六卷子鍾吳乾隆癸未進士任甘肅岷州知州同時有侯鈞者江蘇無錫縣人寄籍大興乾隆十年由舉人任汧陽縣知縣屏供億杜苞苴嘗修三賢祠三賢者燕伋郭欽段秀實也尋調武功縣知縣會有念佛聚衆之獄上官將治以邪教鈞廉得其實曰此愚民求福耳省釋之復任清澗縣知縣多惠政云

舒其紳字佩斯一字蘭圃直隸任邱縣人由縣學生歷官四川墊
江山東滋陽兩縣乾隆三十一年補陝西鄠縣蒞任創修明道書
院自爲之記慨然有培植士風之意又因邑中數失火復修火神
廟以弭災越二年署興安州知州明年調署咸陽縣士民以未得
久霑其澤攀留莫遂立去思碑過者多下拜以恭辦慶典入都特
旨授榆林府知府榆郡自前延綏道佟沛年於雄石峽開渠引水
經數十年輒復淤壞其紳令知縣黃照訪尋遺址溯源山北拓使
南注計長十五里許以資溉灌視昔較廣名之曰廣澤渠其他修
者如榆陽永濟歸德堡諸橋廢墜並舉會有金川之役徵調陝兵
委其紳監送果以紀律嚴明得上考調同州府知府旋調西安府
知府西安首郡最繁劇其紳坐理裕如巡撫畢沅嘗歎曰古所謂
惻愍無華日計不足歲計有餘者殆舒君其人耶遂舉卓異得召

對會甘肅回亂初平上以其紳才特調蘭州府知府辦理善後諸事宜其中歟要擢浙江鹽法道以積勞卒於官其紳守西安時曾輯西安府志八十卷內閣侍讀嚴長明任編纂之責而其紳適綜其成畢沅序其書謂文既簡要事復綜賅非虛語也其在興安咸

陽亦有惠政云

香獻類微督君家傳參西安府志

武若愚山東曹縣人乾隆壬戌進士以知縣分陝西始任鳳翔縣知縣旋調渭南擢邠州知州署鄜州再署乾州爲政勤敏嘗下鄉遇詞訟卽於村樹下剖斷書院課士輒親爲講貫署西安府事以勞卒於官若愚有武技每捕盜挺身親往渭南乾人均盛稱之其尤卓然可紀者爲鳳翔時有劇盜李甲羅乙肆劫數十州縣莫敢誰何而獨不犯鳳翔若愚曰吾民獲安忍令毒他邑乎乃懸賞購之一日偵者來報曰盜從北來驢馬負載互二三里飯大道旁將

南去其魁二人萬人敵也黨十六人皆梟悍莫敢撓其鋒若愚曰
勿恐爾其率爾徒持械索聽命選吏二人僕一人曰足矣城外橋
南平壤可鬪岸側可設伏遂騎而往三人者步從是日微雨若愚
衣製衣縻短兵至其地少休已而盜至李獨身前若愚並轡出其
右間與問答詰所往輒怒吏手利刃抉其裝則金珠充牣盜覺策
騾東東瀕河若愚騎駿甚知人意馱而尾其後盜以文吏忽之若
愚奮銅椎四十斤踏之賊躍起兩吏掣其肘僕自後力擊臂折擒
之羅望見憤奔若愚若愚舍騎迎之未至四五步發鐵彈中其目
僕乘隙撞其胸乃仆群盜譁欲跳伏發無一人脫者至署釋其縛
鞫之時聚觀者數萬人羅猝起奪賣錫者擔走且呼曰不畏死者
來若愚笑曰我在將焉逃徐起追之遇負薪者知盜匿晉井中蒸
薪投之盜激水滅火諭之曰汝逃至海亦不汝縱况井乎乃躍出

鬚髮盡焦矣是役也若愚身蹈不測之險縛虎狼如牢豕使秦地
 數千里無犬吠之警可謂壯矣當是時旁縣聞之走相告曰武君
 神勇天下莫能及若愚易直子諒廉公有威擇民之秀者教之詩
 書其壯者教以兵法所屬回民有罪夜半出片紙拘某人父老飲
 食而送之曰武公汝父母命汝死汝勿求活若愚軀幹瘦小而胆
 略絕倫治行著於陝其擒盜事尤為人所艷稱云

書者獻類徵武君
 事參乾州渭

南鄜州郵
 州各志

張奎祥湖北華容縣人以拔貢生任直隸遷安縣知縣調撫寧升
 滄州知州治行推畿輔第一雍正十三年陝省大吏奏請升同州
 為府統轄十城以為陝東大郡世宗特簡奎祥知同州府事是時
 州邑新增事例創始奎祥斟酌見繁簡咸宜修文廟增考棚添
 書院地租百廢俱舉不煩不擾全境大和復表章忠孝采訪幽隱

爲同州府志五十六卷時乾隆三年也初奎祥蒞任時值旱親詣華嶽峰巔禱之及下山雨隨以降越歲再旱禱降如前有禱雨立應紀事長歌數十年民諷誦之奎祥始任同州府知府再調西安府知府升河南開歸陳許河務兵備道而卒子德履曾任鄜州直隸州知州借補河南儀考河工通判卒於官

同州府志
西安府志

李星曜江南豐縣人監生乾隆二十二年知同州府事明察慈惠十屬安阜而尤加意造士創建豐登書院選生童之有異才者親課之詩文之餘兼教以射暇日宴於豐登閣上飲酒賦詩以寓旨酒承筐之意逾年爲己卯科文武鄉試一時獲雋者文則亞元李泰等十六人武則解元姬輔清等十三人皆出府屬時人榮之負笈而來者益衆而星曜所心賞者則韓城王杰辛己果以一甲一名及第士林傳爲盛事益服星曜有人倫鑒云星曜凡三宴豐登

閣詩文皆嵌於閣壁至今猶存

同州府志

莊振字龍見一字修睦江蘇武進縣人寄籍直隸清苑乾隆末由考職加捐從九品分發陝西振慎言敏事洞達人情每奉上官檄察州縣公事皆辦補城固縣典史未幾以承重丁繼祖母憂服闋補西安府司獄署咸寧縣丞獲鄰境夥盜送部引見擢知縣補韓城振爲政能以誠意感人邑有爭父遺產十餘年告訐不已振引入見各已自首令比肩跪前頗問其父母在時事久之喟然曰而父母至今存而兩人固無間言也各已老大將見父母於地下其思留面目以見之乎訟者乃相持痛哭盡讓所爭與季弟孀婦其治獄多類此嘉慶元年四川等教匪闖入陝西巡撫秦承恩督兵剿之檄振自隨條畫皆中機要賊擾興安據將軍山爲營官兵仰攻多傷振請無攻而潛引兵擇山勢與賊壘對峙者築臺其上發

巨礮擊之賊號呼乞命遂破降之巡撫以聞賞戴藍翎興安在漢水北賊渠張漢潮由鄖襄竄入紫陽石泉川北賊亦由隴山入臨漢欲渡城中守兵才二百恟懼振請曰民船盡聚黑江口若拘集北岸則賊無以渡乃往拘之漢南民避賊來者衆郡戒嚴禁弗納振於路嚴詰賊謀獲衷甲者三十餘人下諸獄餘悉縱以八屬里甲編管之所活數千人返己日昃軍書蝟集隨擘畫之燭未跋而畢巡撫歎曰數刻中了七十二事霹靂手也賊既不得渡又所遣諜被擒不得虛實遂退走興安解嚴南山郡邑皆爲教匪蹂躪而平利尤劇土匪乘間竊發民益擾檄振治之馳往偵得劉添文等十三人誅之乃按行村落分別流民土著給以資衛以兵各歸其鄉井並借籽種安其生業瘡痍之民莫不忭舞巡撫上其功特旨以同知直隸州升用尋補乾州直隸州知州未赴任而賊平制撫

交章薦賞戴花翎加捐知府丁母憂扶柩歸葬會寧陝兵變繼勇
侯德楞泰奉命往剿以振隨並從閱川陝行伍所至汰老弱厚給
賞將士皆奮遷漢中府知府漢中毗川東地爲教匪出沒衢道民
失業餘匪艾冒頂等號紅籤賊時出苦行旅振悉殄之川北民利
食川鹽而陝故食潞鹽主鹽者專官治之與民爭利禁督綦嚴官
民交痛振請漢中一府鹽課悉歸地丁巡撫爲奏定至今稱便郡
有渠漑田久淤豪強占之復親履勘捐資濬治以田畫界時其啟
閉貧民賴焉後引見交軍機記名召問軍營事奏對稱旨尋擢河
南彰衛懷河務兵備道卒於荊隆工所年五十六振所在有惠澤
去而人皆思之子一葆誠

碑傳集莊君堂誌
銘卷香獻類徵

吳沂字浴曾直隸滄州人中乾隆庚辰舉人初官玉田縣教諭升
知縣歷任廣東從化新安東莞授理瑤同知升授陝西漢中府知

府尋調西安尋署陝西督糧道時川楚軍興籌堵禦備糧糈難民逆首姚之富齊王氏竄商藍界圖越秦嶺口沂出後擊之殺賊五百生擒一百七人餘悉遁王廷詔高均德諸賊撲興安城密約謝文武爲接應沂聞警馳擒之擊死百餘人嘉慶二年授潼商兵備道逆匪楊開甲竄商境沂帶兵星馳前往抵商南城閉已三日矣沂令開東門納難民數千人晝夜登陴固守賊環攻不能克乃築商州四屬邑寨堡七百一十座洞一百四十處爲堅壁清野之計教匪事平升授甘肅按察使未抵任而卒子茂楠官東河黃沁

同知

清徵輔先哲傳參者獻類徵台斐音
木傳暨東華錄清史館嘉慶長編

鄧夢琴字虞揮一字實山江西浮梁縣人少貧勤學以小學近思錄洛學編爲宗乾隆壬申成進士選授四川綦江縣知縣有能名先後丁父母憂服闋選授陝西洵陽縣知縣縣多楚人流寓其壑

田者請上官不報升科以利安之其豪猾教民訟持官短長者廉得其歛錢諸簿籍置之法久之調署岐山縣又調署寶雞縣有利民渠開自前明灌田三十頃夢琴濬之增灌至五十頃其南北注渭諸渠亦加疏導縣臨棧道有陳倉東河二驛馬多疲損前令以給里民索其值曰領馬有事復搜私馬應官曰里馬夢琴乃下令領馬者悉交現馬驛遂充非大差不責里馬逆回田五作亂陷通渭疾馳二百里至仙靈峪斷道設戍歸而授兵登陴賊遂不至及漢南援兵過縣供車馬民皆應役如趨私事事平他邑皆訟派累寶雞獨製錦頌縣官過客歎曰寶雞令豈有餘財爲供張耶官無所私而區畫得宜乃使民知感如是以卓異升商州知州擢漢中府知府署陝安道漢中幅員北接寶雞西過金牛峽驛長而馬少役多而民疲五廳州縣不勝拮据夢琴請於藩司借閒款萬金買

馬儲費用民有節赴公遂敏守土者因得息肩略陽之銅州試採
多年矣得不抵費從事者猶希冀萬一夢琴細勘之灼知無效力
請大府封閉遊民既散地方亦寧坐讞南鄭令王行儉獄失出鑄
級將歸矣適荆湖教匪蠢動當事以轉輸重任非夢琴莫可奏請
留任當是時巴州賊羅其清嘯聚方山坪通江賊冉文儔跳梁王
家寨南鄭之小壩毛狗洞皆與接壤夢琴於兩路分設五卡募鄉
勇數百人練行列遣之遠探屢獲賊謀明年夏楚匪竄陝欲由五
郎窺漢中夢琴親往城洋西鄉巡查接界諸隘鄉勇時年已七十
五矣控單騎冒寒暑馳驅羊腸鳥道中風溼所薄遂患足弱逮南
北防戍既定引疾歸嘉慶十三年十一月卒年八十有六其牧商
州也革行戶裁陋規監渭南北諸邑賑也剔浮冒搜隱匿民得實
惠尤爲人所津津樂道者其後九年詔祀名宦祠著有懋亭文集

詩集八卷其他主端明鹿洞所誨示士子及在官所修志書共若干卷官洵陽時答督撫諮訪事宜諸公牘文字皆詳究利病足資考覈子傳安輯爲外集傳安嘉慶十年進士廣東羅源縣知縣

清史

循吏本傳參碑傳集鄧先生墓志銘

莊忻字景炎江蘇武進縣人乾隆十六年召試二等第一其後三遇召試皆二等第一戊子中順天鄉試副貢出大興朱筠之門就職直隸州州判畢沅撫陝奏留忻於陝西逆回蘇四十三倡亂忻司奏節署事平歷攝宜君富平鄠縣事以母憂歸免喪借補渭南縣丞復攝朝邑郿縣盤匡事其在盤匡緝獲鄰邑要犯特旨以知縣題補是年補咸甯縣知縣擢興安府漢陰通判署乾州直隸州知州署興安府知府興安去省會遠山谷居民良莠雜處忻廉得白蓮教頭目蕭貴斂錢聚衆設計捕之置於法旣而楚蜀蔓延興

安獨無事署咸陽知縣會泥河賊王全禮作亂陝甘總督宜綿以
忻練於軍事檄赴軍營敘功賞戴藍翎遷邠州直隸州知州仍留
軍中是年冬教匪屯聚興安之光頭山郡守運餉遠出督撫以忻
諳漢南情形令攝興安府事興安舊以隄爲城坦步可上時楚賊
張添倫等自南鄭渡漢川賊齊王氏等繼之往來石泉漢陰間距
城密邇城中孱兵千人率不任戰忻至首團丁壯令無家者出了
有家者饋食下其令於屬邑未一月得鄉勇數萬因隄高下或塹
或墉身運甌甓爲衆倡築未幾而雉堞煥然爭雄鄰郡矣忻念楚
賊渡漢遠涉西鄉紫陽石泉幅員遼廣戶口稀少焚掠無得必思
歸遁檄沿漢諸縣挈商舶民舟盡入汶港守以重兵使賊不得南
向又念川賊若潰非東走夔州卽北走通江一帶興安當南北之
衝全陝安危所係賊據要險則兵餉俱絕於是度其山川遠近之

勢圖其兵勇卡砦之宜陳之督撫以備策用賊乃不敢窺伺時宜
綿爲統軍倚所爲重在興安三月復檄之去後人守其成法得無
失旣至軍行兵籌餉動合機宜是年十二月連破洞汝二河賊巢
賞換花翎明年宜綿奉命赴蜀督大成砦兵所以受濕疾作遂還
邠州旣痊權鳳翔府事堵禦隴州賊有功調署榆林府居榆五載
老成持重不以察察爲明愛士獨摯浸淫載籍如老諸生事至則
有資育之勇先數年前榆林東南鄉民以徭役不均糾衆百餘人
控縣縣令諭遣之後乃益肆漸聚至二三百人以爲常官不能止
所至爲立公規平戶役戒浮徵禁差索衆猶不悛如前狀遂檄縣
擒治之得爲首數人戍之邊餘皆釋之其風遂戢久之仍還邠州
時年七十矣以子達吉乞養告歸卒於家所在官多陰德嘗鞠邪
教爭於宜綿免株連者萬人朝邑水災爲請賑以已貲八千金濟

之全活無算在邠州免地方科派貼差銀三萬兩去之日百姓求
畫像建生祠所遺書慰之且戒無妄費至今邠人猶能誦其辭也
所與同邑趙懷玉張惠言共爲漢學於聲音訓詁尤深因校刊淮
南子一切經音義生平著作以舟行漢江爲水所淹惟存文六卷

詩七百餘首子達吉任潼關廳同知別有傳

清史文苑附傳卷第
類微君君墓志銘

沈相彬字正亭湖南安福縣人父清乾隆丁酉拔貢生官甘肅蘭
州府知府以老告歸相彬由監生入貲爲知縣嘉慶間攝華州事

有惠政值林清作亂相彬方署潼關廳同知奉檄護解餘黨入都
還陝署孝義廳同知建文廟培士風吏事修舉庭無留牘民咸稱
之擢榆林府知府曲撫善良訪拏奸猾勸民淳樸嚴禁侈風屢捐
俸振興學校創義倉修河隄與延榆綏道顏伯燾撫字勞心惠施
五屬教養兼隆調西安府知府榆民遮道挽留設長生位於余公

祠尋署延榆緩兵備道有聲於時錢汝霖者雲南昆明縣人由乾隆癸酉拔貢中丙子本省鄉試舉人官山西平魯縣知縣調鳳臺縣升潞安府同知擢陝西榆林府知府在任六年興材育士生徒肄業書院者親督課之爲甲乙其文藝如嚴師無少假丁父憂歸遂不復出賃屋而居其苦有過於寒素者爲人性敏而操潔鳳臺

民至今俎豆之

者獻頌徵各本
傳參榆林府志

畢所密字退思一字蘅塘山東文登縣人以監生中乾隆甲午科順天鄉試舉人丁未大挑以知縣分陝西親老告近改發江蘇試用署江陰縣知縣有異政尋丁母憂服闋仍發陝西補鄂縣知縣調署富平縣事次年調任咸寧是時教匪自楚竄秦軍書旁午賊首齊王氏姚之富高均德等十餘萬衆由斜峪關出焚掠盩厔鄂縣直趨西安總兵王文雄將兵四千大破賊於盩屋之焦家鎮殲

其黨萬餘賊始竄入南山是時所密守西安南關日夜防禦閭閻恃以無恐及賊復至大峪口所密率勇壯據險截守得賊遊騎間諜即戮之巡撫秦承恩以防禦功奏賞換五品頂戴以應升之缺升用當寇氛方熾咸寧民居南山下者子弟殉父兄婦女捐軀遠辱所在皆有所密察得三十六人爲請旌表歷任南北數縣每課書院試生童必獎拔其尤使與子弟連席共業咸寧首邑繁劇謁候上官送迎驛使常無暇晷而所密勤於聽斷當晝即決無夜歸者值旱歉設粥廠東郭以救饑餒樞廷大臣有以所密居官清正民情感戴奏聞者而陝撫亦登剡章遂授爲留壩廳同知是時省城方開局辦善後事宜檄所密留省尋署鳳翔府知府查拏逸匪整飭部內明年馳入南山查勘災黎巡察寨堡還署西安府事所密語僚屬曰吾久爲縣令稔知令難爲用是咸推誠相待人亦莫

新陝西通志卷之六十八
十一
欺是年秋穫之際屬縣有被偏災者大府請帑賑濟所密嚴督屬
縣按戶覈散災黎胥霑實惠山中擒獲餘匪發首鄰審訊者凡八
十餘案反覆研訊得實即立正典刑迫脅必啟陳開釋以此全活
者甚衆積勞得痰疾七月卒於官年五十有三所密在陝十餘年
大府以清德直諒倚信特深三輔士民稱頌久而勿替子以緯候

選鹽場大使

賜爲堂文集
舉公行述

葉世倬字子雲江蘇上元縣人乾隆甲午由副貢生中式順天舉
人六赴禮闈不第時朝廷開四庫館充寫書官議敘知縣分發四
川屢遷浙江嘉興府同知湖北德安府同知嘉慶四年選授陝西
西安府同知時教匪未平大府委管軍需局軍需以軍火糧餉爲
急務郡丞專司軍火計歲造火藥四十餘萬斤鉛丸半之火繩三
百餘萬丈烏鎗二萬桿過山烏礮十餘位世倬先事預籌估計料

物事集而費省上官問何以能經理裕如對曰視國事如家事無不辦者約言之賤時買就貴時用閒時製就忙時用如是而已尋攝鳳翔府事時積案未清犴獄爲滿世倬至悉縱遣之約麥秋後訊非命案概不準理幕友持不可世倬曰大凶之後莫急於食若拘牽繩墨必致惰農失業烏乎可饑民以糧不至聚縣大譁世倬發常平倉三千石賑之僚屬勸待上請世倬曰設倉以衛民糧運阻滯官之咎也因是而陷民大獄可乎擅發之咎吾自當之大府卒以世倬能持大體嘉之尋回西安同知任會寧陝鎮兵變省中獲奸細詢知賊蒲大芳犯西安時撫軍率兵討賊世倬言於方伯曰城堅不能猝拔可無患惟城中食少人衆憂在內潰宜清查戶口俾姦宄無所容賊出平地必肆掠宜令四郊老弱婦女並錢穀牲畜移入城壯者居守官帶兵據險要控制之萬一失利退保以

俟援兵其可方伯從之賊偵知有備不果至久之攝同州府事通省賦入以同州爲最積欠甚多世倬至令里胥開報花戶各欠數將親摘訊令下無一牒到蓋欠在吏役不在民也勒限追比積弊頓除逾年題補興安府知府興安鹽課向聽民負販後定爲河東引地籤商行鹽窮民失業者頗夥世倬蒞任以引課仍歸徵納闔郡便之選各鄉生監於市集宣講聖諭廣訓十六條又於律例中擇民間最易犯者九十餘條另刊成帖名曰山中律例須知令各屬一併講解使知禁戒十八年郡大荒以旱潦情形籌畫需帑十餘萬上官難之世倬喟然曰某在此休養數年忍視斯民飢而死耶卽自劾求罷撫軍大驚手書慰留悉如所請世倬榜示通衢某戶賑幾口某口賑若干撫軍太息曰是可爲散賑法矣復蒐輯軍興前後遺事作續興安府志八卷增昭忠節烈二門餘如原例尋

遷福建延建邵道調台灣道兼提督學政升江西按察使山西布政使護巡撫擢福建巡撫兼署總督三年以原官致仕歸抵蘇州九月卒於旅舍年七十有二世倬弱冠有志聖賢之學服官後以興教化美風俗爲已任在西安延岳舍人震川主關中書院在興安行鄉飲酒禮以舉人董詔爲大賓奉差同州舉白水令王希伊祀名宦志節卓然稱良二千石興安士民後請祀世倬名宦云著有健菴日記四錄彙鈔退思堂詩文集子二德豫永定河北岸同知德升候選州吏目孫克昌道光壬午科順天舉人

清史本傳卷
碑集葉公

崇禎
年譜
健

撫民廳

顧聲雷字震蒼一字晉莊江蘇元和縣人中乾隆庚辰舉人充方畧館膳錄丙戌成進士丁父憂貧不能自給廬州府知府祝忻延

主廬江書院造就皆知名士服闋除陝西石泉縣知縣未幾調南鄭縣南鄭爲漢中首邑甫下車興利除弊循聲上徹尋攝興平縣篆縣爲入蜀孔道時金川用兵羽書旁午備著勞績陵墓之隸境內者聲雷推勘界地一整頽廢值歲旱出常平粟計口賑濟給籽種禁民流亡禱雨於縣西門外太白廟甘霖立沛遂立感應碑於廟側增修書院大門講堂東西各房請以新嫩灘租益膏火費輯興平縣志二十五卷上呈畢撫軍沅稱其美備調任咸甯委理疑獄多平反商州民趙成殺死牛姓六人卸罪於子友亮聲雷廉得其實寘成於法友亮改宮刑尋升孝義廳同知在終南山谷勸民開墾以盡地利擢知廣東惠州府五十三年卒聲雷服官廿載事上接下開誠布公持身峻潔而不立崖岸屬吏就範咸砥於廉點勘簿書午夜不倦所蒞之境後先一輒云

著獻類微類君家傳各
乾州咸寧興平石泉參

蓋方泌字季源一字碧軒山東蒲臺縣人以拔貢州判分陝西署漢陰廳通判石泉縣知縣署商州州同其治在商州東百里龍駒寨寨之東爲河南南出武關爲湖北路四通綰商賈輸寫之會又多林莽山徑易憑匿時川楚教匪亂賊屢入陝西塞方泌始至公私掃地赤立而賊酋張漢潮擁衆至乃置藥麵中誘賊劫食多死遂西走大軍乘之漢潮由是不振然且揚言曰必報若方泌集衆謀曰賊雖去必復東若等逃亦死守不得耕種亦死我文官也無兵若能爲吾兵當全活爾衆曰生死惟命乃築堡聚糧三丁抽一得三千人無丁者以財佐糗糧兵械親教之戰辰集午散日無廢農事賊屯山陽鎮安將東走河南方泌率衆迎擊之又擊之於鐵峪鋪逐賊於林中時賊據山上而伏其半於溝乃分兵翦其伏奪

據東山數乘懈擊之殺傷過當賊宵遁卒不得東後賊由雒南東逸方泌馳至分水嶺間道走鐵洞溝出賊前而伏賊錯愕迎戰遂殺數百人鄉兵名由是大振自武關至竹林關鄉兵皆請隸龍駒寨知州某困於賊方泌馳九十里至北灣賊驚曰龍駒寨鄉兵至矣則皆遁是時賊屯商州西及雒南山陽各萬餘人欲東出方泌勒武關竹林兵二萬人列三大營以待賊不敢前適聞官兵自商州至卽前擊賊東西夾攻賊大敗是役也枕戈而寢者五十日遊擊某誣以事解職大吏直其謾得留任賊遂相戒無過商州後授盩厔縣知縣猶時時入山搜賊巡撫上其功賞戴藍翎又生獲寧陝倡亂者四十餘人境內甫定卽捐俸賑饑旌死節婦及河灘馬廠鹽法皆區畫久遠計擢寧陝廳同知仁宗召見問商州事甚悉授四川順慶府知府調成都府知府岐郿有賊入川方泌承大府

命以鄉勇屯川陝要隘賊知爲統龍駒寨鄉兵者也即遁去丁母憂服闋授福建延平府知府尋調臺灣府兩署臺灣道道光十八年卒年七十有一子鈺復官陝西另有傳

任奎光字星珠江蘇荆溪縣人由監生知縣分陝西嘉慶二年署平利縣知縣結寨團勇各大營在平利供億無誤及再任平利值教匪驟圍舊縣奎光力守危城集勇追賊於董家梁遇伏幾不免七年遷縣治城垣公署經營盡善父老至今稱之保升留壩廳同知地當孔道又值兵燹後軺傳旁午應付得當絲毫不以累民廳舊無城前同知龍萬育築土堡旋圯經畧德楞泰巡撫方維甸奏以留壩廳土性夾沙秋間雨多淋塌其舊堡地勢逼窄自應移建甌城以垂永久允之遂於舊城西北之太平山改建廳城特派奎光承修不數年城池營汛以及壇壝祠宇文武官廨倉庫驛舍次

第畢舉當廳城未建時自鳳縣至褒城四百里空曠寫遠軍火糧
餉時有疏虞及甄城工竣頗爲鞏固崇墉仡仡行棧道者心膽爲
之一壯奎光之力也俄三才峽廂匪倡亂擾及廳屬棗木欄奎光
率民勇堵禦四十日賊不敢犯積勞成疾卒於任所卒之日里巷
婦孺無不號咷邑民爲之塑像立祠於舊城焉在任九年慈愛及
民民亦愛之如父母至今猶呼爲任婆婆云初奎光之未權平利
也曾任白河亦有政聲白河邑志併紀之焉

留壩廳志 卷一 參
白河縣志

葉文麟子聖植一字星槎浙江錢塘縣人少穎異善讀書工楷法
入都以兵部則例館議敘選授江蘇呂城司巡檢屢遷至江寧府
江防同知攝通州直隸州知州以公過被劾降級會大學士兩江
總督孫士毅訪文麟罪誤事不實入告起官降選陝西布政司經
歷權孝義川撫民同知孝義川在終南要隘之處設官未久流民

爭據曠土開墾禾熟時輒相爭奪文麟勘定界趾議六年以內勿更佃勿加租限滿聽田主自便申上大府並飭五郎廳鎮安縣一帶仿行之川匪擾關中文麟嚴立保甲團練鄉勇隨提督剿賊於興安雪夜襲破賊營事聞邀御筆記注尋補授興安府通判兼攝孝義川同知賊據鎮安縣光頭山文麟率勇往斷其糧道賊惶遽夜遁是年賊復擾至孝義時官兵甚少環山無城文麟設樓櫓拒之會仲子槐以縣丞效力軍營自大營帶兵入援夾擊破賊得旨嘉獎其後二年槐以奉檄赴洋縣防堵遇賊力戰死之文麟兩攝富平縣值軍書旁午馬上治公牘盡瘁民事修南湖書院延名師課士捐置膏火士多獲雋臨潼旱災民苦差徭罷市值官兵過境大吏惶急以文麟往蒞事下車卽獲澍雨爲革除糜費撫輯回民邑人安堵尋署乾州直隸州知州臨潼士民詣方伯乞留乾州人

爭曰奈何奪我公其得民如此州驛馬不足常貸之民間文麟自捐良馬補之歲需芻豆購以時價民不苦擾以剿賊時墜馬傷疾作嘉慶七年四月卒年七十有五文麟篤於親故以餘祿周卹貧急教督其子弟又好撰集格言以勸人為善云

碑傳集業君墓志錄參孝義廳志

莊達吉字伯鴻江蘇武進縣人邠州知州忻之子也達吉早慧儼儼自喜以詞章受知於畢尙書沅王侍郎昶又與錢州判站洪編修亮吉孫觀察星衍為考據訓詁之學故其在關中名特盛既屢不中選益厭苦場屋入貲為知縣分發陝西試用初至署咸陽再署大荔補藍田調咸寧擢潼關同知每日晨起啜粥盡一器則出坐堂皇決事耳聽口答書牘尾嘗數十行如燭照數計其知咸寧也有兵馬司指揮橫鄉里王仙人者以傳道惑眾到官數日即擒治各論如律巡撫方維甸朱勳目達吉為健吏倚如左右手然達

吉尤以廉惠爲本其在咸陽嘗冬夜入獄閱囚囚二十餘人達吉語之曰歲行暮矣若曹豈欲一歸省父母妻子耶衆皆泣不敢應達吉慨然曰限開印前一日各自投到無負我遂悉縱之至期而二十餘人者來中惟少一人方擬遣役致諸其家而其人已馳至叩頭曰距城遠門且閉幾不得入咸陽人相傳以爲美談達吉旣調咸寧忻解鄆州任致仕比擢潼關廳皆就養署中會同州旱禱雨未應長跪烈日中歷兩時許雨驟至從者請曰可以起矣達吉曰今日雨不沒踝不起已而雨果沒踝歲卒有收以中濕故病足適滑縣軍興陝甘兵奉調出關者相望於道達吉力疾供餼牽足遂大腫不可襪卒於嘉慶十八年十月年五十有四子三曰鈴曰庚曰錯而庚幼殤女子子二達吉著有吹香閣詩多殘缺惟秣陵

秋江上緣樂府二種稿本存焉

香齋
君墓志
頌徵
莊

張聰賢字愛濤安徽桐城縣人太博英之五世孫也乾隆壬子舉於鄉嘉慶辛酉成進士乙丑殿試授翰林院庶吉士散館以知縣用選陝西甘泉縣調補長安縣以卓異升同知直隸州尋丁母憂服闋權知長安縣事久之補潼關廳同知兼權同州府事以辦軍需功加知府銜聰賢性樸素裘馬不飾居官十餘年未演劇飲宴惟以振起士習民風興利除害爲己任在長安最久閔窮民不識詩書勸義學二十餘所以訓蒙士時親考課行賞罰實行保甲匪人不得匿境內回民舊有禮拜寺月朔咸集聰賢因其俗時爲講說孝弟忠信禮義廉恥之事而剖晰是非寓反經以正邪慝之意回民德之縣志不修百餘年懼節孝義行久益湮沒捐俸設局採訪四載告成凡入志者俱給匾額以示風勵書成後又訪得合例若干人皆先旌其閭以俟續登婦女由是皆知貞節爲重有王氏

夫死家人強使改適投井死鄧氏女未嫁夫死亦誓死不渝聰賢聞以鼓樂導歸夫家率邑士往拜之縣舊有蒼龍河年久淤塞每秋澇山水衝突沒長安民田萬五千畝鄂縣田五千畝咸陽田三千畝上流築隄爲防而下流以受害興訟聰賢循視河道勸村民分段開濬河身興築沿河隄岸移書咸鄠兩邑亦如之其去民居遠者不便撥夫則捐俸以濬之一年而工竣河患遂息勒石以垂久遠諭居民立會期每歲三月各清河底淤泥以覆堰益加培築樹株蘆葦礙水道者盡搜掘之俾無阻滯居民設位瞻拜名其河曰張公河道光十一年卒於潼關廳任尋詔入祀名宦祠子四延齡舉人怡齡太學生後官夔州通判佳齡舉人華齡

碑傳續集參
長安縣志

知州

羅文思字曰睿四川合江縣人乾隆戊午科以第一名舉於鄉乙

丑特旨用知縣發陝西歷任白河商南蒲城其任商南也清廉慈惠慎獄恤刑下車後問民疾苦課農桑端士習親履各鄉探訪山川形勝人物風土成商南縣志四卷調任蒲城去之曰民頌之曰昔鄧侯離任挽之不留今羅公離任亦挽之不留千古循良並傳不朽時乾隆十三年也蒞蒲後創修堯山書院捐俸課士文風丕變宰蒲八載遷商州直隸州知州修廢舉墜治化聿新州東四十里有地名銅佛龕者懸崖一綫下臨丹江長五六里商旅往來騾馱行李多有墮巖落水之虞夏秋河水暴漲行者尤苦之文思捐俸五百金運斧開路於槎牙兀嶮中寬可丈許行人利便至今稱曰羅公徧捐金四百於州治之東創建商山書院擇四邑高才生肄業其中自爲文記之又以商屬龍駒寨爲水陸要衝商賈輻輳須設官彈壓請添設州同或州判一員駐紮商郡州同之設自文

思始也復捐俸修城東西門洞及敵樓西門南門亦漸次補增又修東城樓懸大古鐘一口匾曰雄顧武關西城樓匾曰高瞻秦嶺並增修文廟復續輯商州志十卷紀述詳覈士民念之迄今二百年矣猶尸祝未怠云

商州蒲城商南白河諸志參採訪冊

張元林字德滋一字茂軒山西陽曲縣人少穎敏讀書過目成誦中雍正甲辰本省鄉試第一出天津周太史人龍門下周雅重之雍正八年有詔舉賢良周以元林名上引見以知縣用發陝西署神木縣知縣建修倉臺徵收糧石平準斗面里人感之勒碑紀其事兼攝府谷縣篆治亦如之上官嘉其能擢乾州直隸州知州以憂去服闋授綏德直隸州知州前後在陝二十年所至有聲乾隆十八年特簡河南開封府知府累署南汝光道凡五年以疾去官家居七載年七十而卒其在神木府谷也值荒旱流離載道元林

時兼兩篆各發城社倉粟先按戶借給口糧而後詳報有以不先
上詳恐干例議者元林曰神府距西安二千餘里必待請而賑吾
民無遺類矣苟濟於民即罷官可耳由是多所全活綏德州無定
河在綏德城外灘地數百頃每河流漲溢則糧無所出民甚苦之
元林曰去此沮洳薄稅在朝廷如太倉一粟而吾民蒙萬世之利
力爲詳請凡近河之地盡得豁免至今賴焉任神木時辨紳士武
氏女之誣止魏氏退婚且爲備輿服趣魏氏子完配覆勘榆林監
生吳某妻父誣毒之案爲雪其事吳生感之立生祠以祀府谷民
李保妻白氏與鄰村武玉楊寬奉通謀殺夫而誑言答族人有夜
出盜葱不返之語元林疑之曰其夫行竊而婦告人非情也適李
族人迹得保屍及其屨遂拘白氏研審並親至其家搜得凶器即
以白氏等三人置重典先後官秦豫兩省上司有檄委辦理必徹

始徹終悉心籌度雖穹盧枕月毳幕餐風未嘗告勞歷任府州囊無私畜操守清廉屏絕餽送去官之日行橐蕭然元林豐頤廣額善氣迎人凡地方興利除害一有益於百姓者皆不避嫌怨毅然必爲後之人稱其才德有可傳焉

碑傳集張茂軒傳參神木縣志

葉藩字登仁浙江仁和縣人幼能自檢侍母疾足不出戶十六爲諸生試高等補府學生於昆弟居第六於是葉六之名甚噪乾隆庚午鄉試中式舉人次年成進士改翰林院庶吉士習國書散館補江西建昌令丁憂去官服闋補陝西同官縣知縣量移涇陽又移蒲城有惠政辛卯歲饑極力賑卹全活甚衆以卓異薦是年升任乾州知州鞠獄不恃三木反覆初供以求得實同官者多指爲寬弛然爲所治者輒心服曰此眞健吏也尋遷廣西太平府同知升廣東廉州府知府調廣西思恩府知府坐微譴罷歸家藁貧教

授生徒以自給屢為吳楚間書院院長年八十卒

善獻類微載文
獻微存錄參乾

州蒲城同
官各志

莊映字兼訥一字學晦江蘇武進縣人年十二從師鄉塾遇寒食還舍母鄒氏呵之曰家貧方宜努力何以歸為復冒雨去往返蓋三十里其勵學如此稍長從其父紹平入都寄大興籍補生員第一乾隆壬申中順天舉人以迴避格禮部試因入貲為知縣揀發陝西試汧陽攝咸寧調臨潼其在汧陽每讞獄輒疏其始末巡撫行縣問訟事繁簡見所判牘善之下州縣以為法獄未允必與大吏力爭嘗因事觸巡撫明德怒然映終不為屈及明德戍新疆諸受拔擢者瑟縮退映獨周旋患難舉裘為贈繼撫者陳宏謀一見契合題授醴泉縣知縣醴泉居西路衝要烏魯木齊用兵添設中站驛馬少借給於民貪吏或斃所乘騎民大苦之映禁借民馬撥

帑金買充募民之無業者職飼養使遞羽書皆樂用命比撤站賣馬還帑猶多美金邑有衛丁數百家授田盡磽确且沙水爲患舊額重積逋又請上官減其糧額己卯充陝西鄉試同考官校閱無遺憾其攝咸寧多積案未結有兩造死猶下牒拘訊者命吏早牘則纍纍盈几檢視既周次第剖決案爲之空蒞醴泉五年輿情悅服去任獄無死囚在臨潼值歲歉斗麥錢五百他邑多拘滯映以實報得緩徵又捐金爲倡設粥廠施絮衣全活頗衆他邑民至者居以寺觀未嘗岐視會巡撫鄂弼查社倉穀數虧者過半立限奏追時穀價二倍窮黎束手自布政使以下莫敢申論映慨然曰民瀕死亡忍更鞭笞之耶歲已逼除馳至西安泣陳情狀請俟穀賤補償巡撫爲之動容令以牒請牒上署可得通行展限迺擇穀之紅腐者減價糶之明年麥大稔以糶價糶償所虧適如其額明德

再撫陝薦堪勝知府有旨記名候升然映以母春秋高決意乞養及遷商州而映已就道矣嘉慶六年九月卒年八十有四子六人孫十人孫女十人曾孫四人映棲家術垂四十年伉儷偕老孫曾滿前人徒見其極林泉頤養之福而不知有足以致之者在也

傳碑

集莊君墓志銘參臨潼志

馬學賜字葵園直隸遷安縣人中乾隆戊申舉人癸丑成進士授陝西藍田縣知縣捐俸創修玉山書院親選高才生教之多成名者諸生歌詩刻石以誌歲旱徒跣禱於輞峪之錫水洞雨立沛公餘纂縣志輯純孝錄勸孝歌令瞽者傳唱以儆愚頑有父子異居者聞而感泣卒爲孝子調任涇陽藍田民爲建生祠釀金以祖其行學賜辭不獲乃以其金爲書院膏火費治涇六年一如在藍時有馬青天之目教匪擾關中有賊謀縱馬大呼曰賊至矣士民洶

懼請閉城以守學賜曰果爾則墜其術中矣乃下令人授一兵家各爲衛城門洞開秉燭以待之賊竟不至而鄰邑之閉城者城外悉被焚掠矣越日有回匪嘯聚於鄉或以潛謀不軌聞大吏檄率兵往剿學賜曰此無知愚民爲教匪所煽耳黎明率數人入賊巢賊棄刃環跪齊呼青天學賜南向坐諭以禍福咸感泣崩角而散是時有訛傳學賜爲賊所困者周衢而呼老弱皆持械出襟上粉書馬字馳而來遇諸塗歡呼擁至署始去有民婦訟前妻子不孝者學賜命笞其子將刑遽止之謂婦曰汝子旣無狀爲若理家者誰耶婦以夫之族弟某告命拘某至斥之曰汝以疏間親伊子不肖汝旣不教誨之伊訟其子汝又不勸止之是必汝爲此計欲逐其子以侵其家耳鞠之則婦家田房券已半入某手矣學賜大怒立追還其券逐之去並召其夫兄至使攜歸諄諄勸諭之母子皆

感泣有訝其神而問之曰吾相其癡愿樸訥必非桀鷲者且將杖時見其臂有笞痕必曾經控送者檢舊牘果然大學士韓城王杰稱爲陝西第一好官無何遽引疾歸再起補渭南縣知縣西安將軍僕牧馬傷民田民控之拘僕至僕曰是將軍之馬曰將軍教爾牧馬教爾傷田乎笞而逐之尋擢商州知州未履任卒年五十四貧不能歸喪大吏查其在涇有應領馬價七白金開庫給之始得歸葬藍涇士民有徒步數百里赴弔者學賜歷充乾隆甲寅乙卯嘉慶戊午辛酉四科陝西鄉試同考官乙卯戊午武闈同考官號稱得人著有玉照軒詩文集行世道光十九年祀藍田名宦祠二十三年祀遷安鄉賢祠

清徵補先哲傳參藍田涇陽渭南各縣志

朱廷樸字朝範湖南湘潭縣人乾隆庚辰舉人分發陝西歷知宜川韓城三水等縣補朝邑將調山陽民籲大府乞留尋署鄜州知

州亦如之朝邑學額止十五名廷模修爨舍建義學作育有方得增額四之一縣城被水衝圯申請勸修易土而甑復建長隄資保障縣界華陰永濟低田爲泥沙淤壅不分畛域廷模履畝會勘訖訟始息朱聲亨字甌山亦湘潭縣人有膂力能舉百鈞然嗜學務窮根抵乾隆癸卯成進士初令廣東遷陝西訖於甘肅凡歷十二任訟獄皆親理不假手書幕任清澗時有被盜者聲亨突拘木工其人素無敗行士紳多具狀請保者而聲亨已於盜竈下搜得賊三百金在陝偵南山餘匪於百里外會暮役皆倦休聲亨循行館外驚曰氛甚惡宜速行疾馳數里火起而匪集矣嘗祈雨苦風不息乃設風神位刑黑犬厭而葬之雨立沛尋舉卓異擢安西直隸州知州踰年卒於官郭士頴字樂僖湖南巴陵縣人乾隆庚子舉人歷官陝西靖邊耀州郿縣城固寶雞等州縣官城固最久察除

水利積弊去縣日士民餓送四十里不絕士類曉律令工聽斷著有懷刑摘錄行世又有草草吟野興錄

香獻類微朱廷模等本
傳參清淵靖邊等縣志

龔景瀚字惟廣一字海峯福建閩縣人父一發雲南鎮南州知州稱循吏景瀚幼就傅日誦數千言年十八補府學生員乾隆戊子舉於鄉明年成進士以知縣歸部候選里居教授十有四年研究經史時務凡古今因革必窮源竟委求所以通變宜民之道久之選授甘肅靖遠縣知縣旋委署中衛縣權固原州知州兼攝鹽茶廳撫民同知權循化廳同知擢陝西邠州直隸州知州參督府宜縣軍事當是時督府奉旨治事蘭州而西安又召滿兵赴楚馬首東西未定景瀚進曰今楚賊蠢動商洛毗連鄂境宜防內逆響應力請東行彈壓督府從之及督府抵關中奉廷寄適如景瀚所言於是幕中大小事悉令參決而後行尋以緝鞠逆犯功奏升知府

從大營攻剽鄖西賊平之復籌漢南以北善後事宜乃還既而督
府以蜀楚賊氛熾率兵赴陝而興安賊徒屯聚窺伺郡城陝撫連
檄告急景瀚從督府至督戰破賊巢五賊首乞降餘奔竄陝境平
補慶陽府知府復從大軍入蜀冒雪攀崖屢瀕於危從攻三賊巢
破之尋以前從攻五柞雲作即雲功賜花翎及督府移駐興安禦陝
賊復奏調景瀚知蘭州府事時教匪四竄流賊之勢已成景瀚隨
營充左翼長上堅壁清野議備陳調兵增兵鄉勇三害剿賊四難
又云先安民然後能殺賊民志固則賊勢衰使之無所裹脅多一
民卽少一賊民居奠則賊食絕使之無所擄掠民有一日之糧卽
賊少一日之食用堅壁清野之法令百姓自相保聚賊未至則力
農貿易各安其生賊既至則閉柵登陴相與爲守民有恃無恐自
不至於逃亡其要先慎簡良吏次相度形勢次選擇頭目次清查

保甲次訓練壯丁次積貯糧穀次籌畫經費如是行之則有十利
反復數千言剴切中事理嗣是被兵各省舉仿其法民獲自保成
效大著任蘭州府二年送部引見卒於京仁宗採其議入皇清文
穎祀蘭州府名宦祠景瀚豁達明敏曉兵事馳驅戎馬間追徧賊
壘不動聲色嘗返蘭州宿江口中夜譌傳賊至百姓驚竄丁役烏
散景瀚堅臥不起俄而覺其妄其臨事鎮定皆此類也景瀚雖補
官甘肅而從戎陝西之日爲多子四式穀壽州知州受穀舉人左
翼宗學教習豐穀舉人湖北天門縣知縣瑞穀進士陝西延榆綏

道

清史本傳參著
類微碑傳集

鄭大綸字掌之又字補之江蘇如皋縣人乾隆元年援新例出知
陝西隴州隴坻地高而土瘠民田每苦風旱當事議多鑿井事迂
遠而卒不可行大綸至縣訪匏吳輔故迹濬舊渠以疏泉脈而泄

地氣又令人之南方募水工教民以溉播之法嗣後畝入一鍾大
綸益廣布區田蠶政之書使百姓專力耕桑雖有凶荒而農民無
菜色隴士向不知學科第鮮少爲修書院置學田築文筆峰建魁
星閣所以興起之途無所不備由是文風漸盛列賢書而歌鹿鳴
者頗有人矣隴俗勁悍不循禮法大綸去秦去甚布寬大之政兼
并之豪胥篋之盜椎埋之奸悉予自新民感激不爲非汧河爲東
西要道僅有木橋二春夏雨多山水驟發橋盡衝壞行旅望洋而
歎大綸造四舟以爲義渡往來遂成坦途隴與甘肅接壤甘肅歲
荒饑民數千就食於隴大綸曰若待報而後發倉民其殍矣即按
口給糧安其居時其醫藥而棺其斃者至春麥熟資流人還之鄉
人得無害歲旱禱縣之龍潭輒雨治隴十年摘伏發奸案無留牘
吏胥不敢因緣爲奸而民不擾兼攝汧陽事前令虧帑至二千金

力不能償大綸矜其廉悉肩任無難色邑令得以脫然歸故土以治隴者治淇恩威深入民隱去後邑人立碑以誌遺愛時桂林陳宏謀巡撫陝西大綸以僚屬謁見與語興除利弊事宜大綸指陳明畫洞悉本原或獨排群議斟酌時勢令人各如其意所欲出宏謀深器之擬列薦剡而大綸以葬父乞假歸陳情迫切至於涕零宏謀感其孝思不得已始從其請葬事畢遂不復出山以乾隆三

十一年卒於家

碑傳集

知縣

喬履信字實夫一字敦峰河南偃師縣人年十七補博士弟子員雍正己酉舉於鄉次年成進士以知縣分發陝西時年二十二而器宇凝重識見老成會修陝西省通志履信分纂紀事經籍古蹟三門尋委署鄯縣事甫下車值大旱履信徒步禱太白山雨應時

至旱不爲災適協辦軍需驟頭設法採買毫不累民鄙學向無學
田履信特置若干畝俾師生膏火資有所取給爲政期年綱紀秩
然調富平縣知縣富平俗稱澆漓履信念鄉甲爲政治根本仿周
禮比長閭胥之義於每村中舉公直端方者一人爲鄉約司勸導
擇精明強幹者一人爲練總司巡查慎選任以重其權永革沿門
挨排俗規已念村堡晨星稽查爲難參酌明道先生鄉會之法編
四鄉鎮寨凡近在四五里內者爲一聯每聯之內舉紳士年尊德
邵行淑才優者一人爲約正擇練達服衆正直居心者一人爲鄉
長約正專司宣講聖諭化導聯內人民凡聯中善惡事跡鄉練會
同牌甲舉報約正會同鄉長查實書名於簿季終攷核獎誠使善
者知自好而爲惡者亦改過自新其鄉長俾董率一聯之鄉練居
民稽察保甲如盤詰奸宄查拏賭博等事其各堡鄉約練總等有

玩法懶惰徇私不公之事約正鄉長會同揭報而於其中實力任事著有成勞者或鄉飲延賓或表廬志美務極禮貌之隆縣屬共得八十五聯每聯領十餘堡著有鄉甲條約一書付給約正鄉長網舉目張星羅碁布守望相助脈絡相親故頻陽賭具拜筵諸陋習盡革尤加意學校卽齋房建義學延師訓邑子弟暇則進諸生講學論文無倦色乾隆元年秋學宮鐘鼓自鳴踰旬乃巳是年值鄉試撤棘後邑士登賢書者八人科名之盛從前未有履信又念士子於庠序外無訓課地捐俸飭工鳩材創書院於縣東之南湖聘名師講習其中而日有課月有會時與諸生談道論文是時邑治孫姜里自康熙二十一年被水冲田一十九頃餘地去糧存履信力請豁除民獲蘇息有值日糧正者每年率科派二千餘金廉知其弊亦力爲禁革三年被冰雹災懇請賑濟親歷四鄉踏勘按

戶給粟使吏役不得侵漁鄰邑民至有以不得籍富平爲憾者鄉
飲酒之禮歷年有酬謝犒賞諸陋規吏借爲奇貨每伺富翁家聲
言舉報飽其欲則轉而之他履信悉革除之而人士始知有鄉飲
之榮在富平五年又署白水高陵二縣威惠丕著偶因公赴省謁
大府他邑有以作官之道請者曰但得如富平令足矣別無他道
也調咸寧知縣縣附郭迫於供應不暇親民事履信治咸鄉甲保
伍一如治富十九社民情大和民壯工食舊係里下私幫年約二
千金出示革去另爲設法出放倉糧舊係舖戶領納里民每石包
銀若干恐出納多累且省出納之苦也履信知之歎曰積貯美政
而乃害民至此乎傳諭鄉練等願領者預造清冊按里限日給發
自是里民稱便而舖戶不得借以射利咸爲三省孔道應接無虛
日物料舊借支行戶或有朽遺商人苦之履信白上台用存公銀

修三省會館並置物件登交代簿使主者不得侵蝕墩臺悉易以
甄會城中兵民相錯極難理獨於履信帖然不敢犯有大案台司
輒委審定榆林縣令及郡守互揭歷審多出履信曰殺人以媚
人奚其可雖知以遲延被參而讞惟明允厥後卒不能出其議丁
母憂解任旋里十年起復赴都用薦者奉旨以御史記名候補暫
授禮部儀制司主事十一年三月以疾卒年三十八履信宰三縣
兼攝兩邑開誠布公每接紳士與談士風民情欸洽如家人父子
而弊絕風清罔敢干以私者雅有人倫之鑒所識拔皆知名士多
掇巍科者所著有鄉甲條約富平縣志寧遠堂詩草陝西通志稿

碑傳集
卷之六
富平縣志
侯

顧捷字肇聲江蘇長洲縣人監生捷少力學涉歷經史兼通術數
之書屢赴省試不第乃循例謁選吏部初得直隸鹽山令引見世

宗目之曰是人風格老成改福建浦城期年以母喪歸服闋補陝西蒲城縣知縣蒲號劇邑留獄至數百事榘自取案牘不經吏手取次審決半年而獄清異時官徵錢糧聽吏收納無冊籍可按榘始造實徵冊設銀櫃令民自封投櫃吏司會計而已賊殺王之博幼女前令坐其叔母與人通因而致女死抵死罪者三人榘察其冤爲力爭於上遂得平反猾賊閭之發行竊數郡縣賄通上下捕者不能得榘密跡之以他事往突擒之餘賊盡置於法蒲境以寧乃設書院立義學教諸生徒頒先輩名文爲之式士咸奮於學在蒲三年遇大計上官以才首薦吏部列一等議叙榘久勞於外思得就閒入貲爲中書舍人旣去蒲人爲立去思碑匾其堂曰青天白日榘聞而歎曰吾爲民父母求無愧父母之實而不可得也今若此是重吾愧也因致書新任者令徹去之所撰詩古文名碧雲

堂集雅好碑帖纂金石考二卷乾隆三十二年九月卒於家年六十有五妻何氏性警敏善知人情能贊決事槩在蒲城有富人徐納稅銀敞之則僞銀也槩欲罪之氏曰富人顧惜身家決不爲此必受他人欺耳若遽罪之其家且破盍少緩焉槩乃密訪之果得作僞者按其罪初至蒲時前令何玉璣故與槩妻家通譜謀因遣使道懇勸氏曰公事未畢豈可以接私親諭使者退旣而何之眷屬羈於蒲時復周其乏其達大體如此子五女四孫八曾孫四

獻者

類
徵
顯
君
嘉
志

梁善長字崇一又字燮菴廣東順德縣人少穎悟補縣學生舉乾隆壬午鄉試次年成進士歸主粵秀書院講席丁父憂服闋選授陝西白水縣知縣白水號瘠敝民多通賦善長至較定斗籌十餘年積欠全登故事民供官薪鹽歲數百金當商時節遺送亦各百

數並申上官裁之士風樸不知書善長每過文廟必步行人始稍敬學朔望集諸生課食之文風日上縣志舊缺手自纂修共成四卷癸酉饑有旨給賑單騎下鄉親點貧戶不以屬幕友亦不假吏胥巡撫某行縣過白水吏請入巡撫曰梁令君子當不欺我竟去甲戌又饑善長自出俸設粥凡數月他縣民多來就食會攝澄城縣事淫雨山水冲塌民居多溺死者急捐金爲修治民畫像祀焉老民某者地爲豪右奪訟久不決善長判還之爲責豪者老民月吉必至署門叩首三將去臥轍留者幾萬人旣又權蒲城一載民爲之語曰一文不取清如白水錦繡滿胸多謝梁公調邵陽修復書院日聚諸生講習邵陽俊秀援例爲國子生者必見令以十二金爲贄辭之不可則積助院中膏火費值軍興日供馬畜芻料善長懼累民必親巡給數月民間無纖毫擾上官檄稽葭州倉穀

道白水父老往來迎送數千人爲駐旬日乃得行薦卓異將入都
四縣民合觴爲壽善長勞苦教誨若子弟蓋視四縣民如一縣也
引見後擢福建建寧府同知既南遷方欲請養竟以是年九月病
卒子適至棺斂無所出以同官賻喪始歸子瑰玉縣學生長孫之
任嘉慶甲子科舉人善長著有廣東詩粹著錄四庫全書總目又
彭衙編二編禮鵠詩鵠訓俗邇言古詩選鑑堂子古文選明文粹
國朝墨粹考卷粹白水縣志鑑堂詩集葭州吟北岸小草文集總
若干卷閩中金玉麟紀之曰乾隆十四年善長由白水調澄城愛
民如子好士若渴不事嚴苛而人自愛敬嘗思以心經術飾吏治
一時學問文章爲秦中州縣冠後又調邵陽始終如一至今三縣

士民猶傳誦之云

善長類微梁君傳
參同陽冊澄城志

千禧四川閬中縣人雍正五年以舉人大挑知縣發陝西署褒城

雲臺書院選拔俊髦延師訓課置地五十餘畝以供館穀又以觀
內朱文公祠字簡陋增建殿廡復置地數畝爲祭田前後計費千
金皆出自已入貲爲兵馬司指揮再遷淮運分司擢刑部郎中猶
惓惓於華陰也其在華陰時慨舊刊華嶽誌穢蕪另爲訂修已輯
成帙意有未愜攜之而行歷二十餘年始梓行於杭云

聶燾字環溪湖南衡山縣人孝事父母及繼母人無間言雍正乙
卯舉於鄉乾隆己未成進士出知陝西鎮安縣會大兵征金川軍
需馬匹民不能備燾於龍駒寨捐貲僱用大兵得以通行居民安
堵如故四鄉舊置社倉遠者或四百里民人馱負維艱且時罹虎
患燾於野珠土茅二坪移建兩社倉民咸稱便復募獵戶能搏虎
者重賞之於是虎患以除捐廉建崇聖祠魁星閣重修文廟文昌
宮城隍廟移啟聖祠於大成殿後名宦鄉賢兩祠於戟門左右輯

志乘立虹化亭教民飼蠶及種棉紡布樓子石者入省要衝也爲
蛟水冲決巡撫陳宏謀以其任事實心特檄監督開闢庫峪口入
省新路清查廢寺常住田價建啟秀山房於東門先農壇左以爲
義塾鎮邑之有義學自燾始在任八年治行推陝南第一尋薦卓
異調鳳翔知縣丁母憂歸構別業郊外讀書授徒晨夕歸省其父
顏曰近養堂居數年父沒讀禮其中易名近倚廬乾隆癸巳舉鄉
飲大賓卒年七十有九從祀鄉賢並祀鎮安名宦祠著有塾說鎮
安縣志環溪草堂文集四卷父繼模著有誠子書尤膾炙人口文
入牧令全書中子肇魁乾隆壬子以優貢舉鄉試

著錄
縣志
第參
鎮安

志鄉
土

劉啟拔字超才湖南醴陵縣人少孤母賀苦節撫育長而嗜學有
聲庠序選授新寧教諭擢廣西陽朔縣知縣丁母憂服闋揀發四

川署峨嵋縣事檄辦金川軍需改官陝西初署紫陽縣再權略陽
略陽地界秦蜀萬山重複為奸人出沒所啟拔嚴行保甲四境帖
然尋補延長縣知縣抵任政簡刑寬民情肯洽己亥冬卒同寅某
輓之有范丹釜底無餘物海瑞靈前僅冷霜之句咸以為得其實

云子繼顯乾隆辛卯舉人官宜章縣教諭

著獻類徵劉政拔
本傳參延長縣志

王希伊字耕伯江蘇寶應縣人祖懋竝翰林院編修希伊中乾隆
辛酉舉人畢沅撫陝時始任白水縣知縣實心愛民不利於民者
不憚觸上官怒以與之爭裁革陋規謝絕餽遺慈祥嚴肅相濟互
用徵收錢糧聽民自封投櫃每月朔望出就城市宣講聖諭反復
詳盡復於每條下編為歌詞或集古人詩刊刻散給其鄉鎮十數
處期日而群市易民爭赴之俗曰趕集民趕集希伊亦依其期而
至至則就隙地爽垲者呼老壯婦稚與之言如何為孝如何為弟

待人宜如何忠如何讓如何勤儉治生計人見其意肫切久而樂聞且信從之時有曲直卽面爲判理民以大化爭訟息而盜以戢白水向無書院希伊捐俸創建彭衙書堂三十餘間令生童肄業其中並續修縣志二卷簡易明切文獻賴以有徵翰林院侍讀學士朱筠稱其能以程朱之學致卓魯之績治白水五年矣適逃兵經其縣而逸例干部議畢沅檄令至省希伊則理算其倉庫登册挾印而來沅故欲全之也語以移署他縣可寬其限以俟捕希伊毅然曰是大不可將欺朝廷乎遂懷中出印奉之沅沅無能爲辭婉令暫以差往他省候部覆至乃聽命沅以其事奏入上曰各省逃兵多矣若以此紛紛離任其孰能盡心牧我民飭部毋泥例而令王希伊回原任亦異數也於是復蒞白水又二年以病改青浦縣教諭尋乞歸卒年七十六著有清白堂存稿十二卷彭衙存稿

十卷由拳存稿四卷詩集十卷嘉慶八年縣人請以希伊入祀白

水名宦祠

國史循吏本傳參同
州府志原獻文錄

郭嵩字喬望安徽全椒縣舉人長大美髯自號髯樵乾隆三十九年授南鄭縣知縣邑爲知府治所學使問歲一按臨考棚昔用茅四十年又值學試嵩慨然掀髯自出貲易以瓦壯其棟宇俾闔屬試者千百人安如家處戴祖啟主講關中時爲文以記之又修方正學祠創建兩學官署葺書院月一再親課如其子弟邑之秀異及鄰邑有志趣者或謁講幄僉曰經師人師云漢川田重堰嵩每不避暑雨屏騶從視隄渠壞者修之淤者浚之又因勢開渠灌田

以頃計者且百時稱郭公渠云

南鄭縣新志
參探訪冊

路學宏字宏邵一字慕堂江蘇宜興縣人乾隆乙酉拔貢生辛卯中本省鄉試舉人四十六年辛丑大挑一等分發陝西以知縣試

用初攝山陽縣調權麟遊縣值甘回田五據石峯堡肆焚劫逼麟
遊學宏騎馳境上傍險築五堡練鄉兵防禦積糧選械分士卒登
陣守募義勇列營城下號令嚴整諭居民無恐賊竟不敢犯巡砦
官鳳翔丞陳某裨將喬某邏回民馬二指爲賊謀密報上官械馬
二送縣希得功學宏疑馬二非賊微服至所居村密訪之果非賊
也竟釋之而上官業受丞等報謂逆且入陝境趣重兵戍麟遊檄
興漢道兵備副使長白豐紳按馬二學宏速具牛酒慰戍者戒無
驛騷而自迎見豐道豐初聞馬二釋頗疑怪已而知其事之誣也
乃大服謂學宏有定變才即撤兵去田五亦尋減授宜川知縣初
至積牘纍纍自限十日剖釋無留獄公餘振興學校子弟得其造
就者不少縣北境最遼遠群不逞據爲藪穴名勾而實盜百十輩
蹂躪鄉落所至索供張脅婦女縫紉行酒大爲民患學宏購捕渠

魁數人立斃之餘黨悉屏跡去巨猾陳彥宗陳亞子橫邑中莫敢詰問學宏甫下車即名捕之置於法一邑稱快學宏以宋儒胡安定張橫渠嘗宦宜川建二賢祠躬率士民謁祠下講東西銘及教授湖州條約長幼環聽俗爲丕變在縣六載引年歸去時士民泣送者數百里不絕嘉慶六年十一月卒年八十有二邑人請之大吏祀孝弟祠子五應求附貢生應祁增貢生應彝庚子舉人應升應恩國子監生孫十二人曾孫四人

者獻版徵路君傳參碑傳集
路君墓表山陽縣遊宜川各

志

宋世榮字占勛浙江臨海縣人中乾隆戊申舉人以教習官陝西扶風縣知縣地當川藏孔道夫馬悉斂之民計畝索錢名曰公局世榮多所裁革無妄取時教匪初定州縣多以獲盜遷擢扶風民有持齋爲怨家所訐者大府飛檄至捕而鞠之皆良民釋之既而

罷歸研求經訓熟於諧聲假借之例著周禮故書疏證六卷儀禮古今文疏證二卷峒山駢體文四卷紅杏軒詩鈔十七卷扶風縣志十七卷其序略曰不敢逞空談而忘實據不敢銜該博而事鈔胥大約唐以前扶風之境字事實有其舉之存其畧而不敢刪庶後此志扶風者之有考唐以後扶風之境字事實比而列之核其實而不敢誣庶後此志扶風者之可繼其爲學之實事求是可見矣志中稱有漳川詩徵漳川文徵兩書似未成外間亦未覩刊本

云

清史源學本傳
參扶風縣志

張丙鯤字南池湖北黃安縣人乾隆辛酉拔貢生以知縣發陝西所至有善政讞三水獄釋枉繫三百人署葭州代完貧民逋賦在涇陽禁治標兵私牧之擾在扶風卻里長供給在寶鷄革里長科派終任邠陽值歲荒上辦賑條陳糾剔採買規弊民德之爲立祠

與明名宦葉夢熊並祠焉選大荔縣知縣爲同州府知府李星耀屬吏星耀公暇出獵歸遲丙鯤命先閉城門及歸闈人不納奔告丙鯤乃親來啟之次日以所獵餉丙鯤乃呼其與人賜之星耀大恚兩年後星耀擢四川川東道將行丙鯤驢焉星耀問其故丙鯤曰始恐涉賄賂今則交際也星耀始服其爲人孫錫謙官湖南辰

州永州知府嘉慶乙丑進士也

湖北通志卷

曹之升字寅谷浙江蕭山縣人學博文閱尤精時藝嘉慶元年丙辰成進士授陝西中部縣知縣歷任醴泉三原蒲城知縣教士有法時值兵荒發倉粟賑貧乏其減收耗羨一事蒲城人至今德之蒲城耗羨自雍正四年奉文民屯地丁並課程匠價銀每兩徵耗羨銀二錢以一錢五分充公用養廉以五分置助社倉乾隆元年裁減五分照一錢五分徵收而官吏用項迭增民間完正銀一兩

納加耗銀多至四錢累民特甚之升蒞任深恤民困稟請減收言之透切後來交者遂祇以庫平三錢爲準計收耗銀三萬一千一百三十五兩二錢有奇凡起運正銀每兩加耗銀一錢五分共解耗銀一萬四千六百八十一兩九錢一分一釐八毫再除解費五千外止餘銀九千六百八十一兩九錢一分一釐八毫備解攤欸顧蒲邑歲徵地丁銀一十一萬二千八百餘兩賦額爲通省之冠後雖免徵荒地暨未升科地共一千四百七十餘畝計銀八千八百餘兩外仍存一十萬三千七百餘兩以上之升爲之每兩減去一錢約少收耗羨銀每歲一萬兩有奇蒲邑民力少蘇之升力也

其中部亦有善政著有寅谷文稿暨四書撫餘錄行世

蒲城縣志嘉慶

長編參業健苑
年譜制藝叢話

劉逢字原旂湖南新化縣人乾隆庚子舉於鄉以大挑知縣發陝

西試用初至值川楚用兵大吏檄赴軍營多所毗贊久之署中部
縣知縣旋調署膚施縣膚施爲延安附郭邑地當衝而苦寒逢因
俗爲治勤墾荒種蕓薯代粟未幾以憂去送者多泣下服闋還陝
補白水縣知縣白水在北山之麓漢唐以來號稱幽寂川楚餘匪
竄匿其中數出爲民患官兵搜捕多失利逢至團練丁壯數以計
擒其酋斬之餘黨竄散民賴以安性清介在任十餘年囊無長物
然脫略尙氣不悅於上官爲所中旣罷白水人醵錢爲買山陬荒
地三十畝居之逢乃召其族人移居墾種遂爲白水人

書缺類逢
劉逢本傳

王元亮字揆百一字希陶直隸阜平縣人少劬學工書乾隆四十

二年以拔貢生肄業國子監高宗臨雍元亮隨例獻詩賦上嘉之
賜黃絹庫銀歲滿以教諭選用再充四庫館謄錄授平谷縣教諭
調慶雲所至以整飭學校爲務總督顏檢署上考授陝西洋縣知

縣除糶政省徒役決獄禁株連興學育士尤有功臣咸頌之是年岐山教匪萬五糾吳奇諸黨倡亂陷岐山寧陝郿縣蔓延蓋屋褒城寶雞間關中大震漢中鎮總兵督軍分捕賊潰竄洋縣元亮募勇丁數百分隘防之掘城壕制器械士民皆感奮效死賊略城東八里關元亮與守備馳勦命老弱悉入城發倉米飫之或以官倉糧不可動阻之元亮曰活千萬人而罪一人所得多矣已而賊退復至見守禦嚴仍走時大軍踵賊至洋元亮籌餽無少誤亂之始作也洋邑密邇賊巢大軍往來支應費且不貲元亮銳意任之略不爲後計初元亮父政疾革時教諸子曰吾數十年擢節積薄田留以備國家緩急將以忠義遺汝曹非以高貲雄鄉里也至是元亮盡輸其財以佐公用賊出太白山縱橫繹騷元亮偵其將濟漢江入蜀也飛騎報大軍及四川督帥越四日賊果奪渭門浮漢入

川成都將軍得元亮報急督兵扼險以守賊不虞官軍猝至欲回
竄秦而大軍拊其背夾擊盡殲其衆人以是多元亮之功事平以
勞致疾幾不起數請解官大府重之未允其所報軍需不如例者
五千餘金同官釀金以助元亮復命其子仁馳歸鬻產以足之疾
瘥調延長縣士民焚香餞送至雞頭關不絕二十年以疾乞休歸

年八十卒

畿輔先哲傳參洋
縣延安兩縣志

張履程字柏軒雲南建水縣舉人以知縣分陝西嘉慶二十二年
補華陰縣知縣操廉履清持平行恕在任年餘民無冤者華陰地
澆而疆狹當潼關首衝差徭之煩甲於通省履程於不能力役者
概免之往往捐廉俸以墊給課士如老學究擇其尤秀者口講手
評至夜分不倦二十四年夏秋大雨四十餘日河洛渭交漲田廬
咸浸壯者木處老弱婦女或棲屋極履程開倉出麥易蒸餅載筏

親往食之朝邑民亦來乞食吏斬不與履程曰等饑耳奚區別焉於是活者萬餘人潼關同知某忌之以擅開倉廩聞於上迨委驗則已買補矣方山河者華州華陰分界處也水出方山流迅而易泛稍漲即滄田畝故自明代以來兩界民角訟無虛歲是年亦漲漂民居履程往勘之相其形勢築某處隄開某處渠某灣宜取直某淺宜挑深不十日工竣兩界民各輸服迄今數十年水不爲害履程去任日士民祖餞者塞途至車馬不能行華州民亦焚香跪送履程居官平易不博取一時赫赫名事關民生者慨然任之以利害攫心故能結民之深如此也邑人區其堂皇曰民之父母按察姚祖同兵備朱桂楨見之歎曰張君真不愧此四字矣

同州府志

編纂江寧吳廷錫